

適園叢書

張宗祥



唐大詔令集卷第七十品以上皇並加諡號本朝臣實與一

宋敏求編

典禮

南郊四酒則耕禮樂則東流所南集定具會書

貞元六年南郊赦十六軍將軍諸道刺史節度使

貞元九年南郊大赦天下制以上級猶十餘四品

元和二年南郊赦天下樂之興毀教計無惑不離

長慶元年南郊改元赦潛滋等之禍四路其德言

寶歷元年南郊赦朝臣恩赦上瀛南黎豐據奉慈

南郊四重觀州無天符附書新時生博空諸縣存其茶

貞元六年南郊赦之雖然其數日之內其天以節

禮稱日至而郊詩美豐年之報然則迎日之始時莫大焉順成之祐慶莫重焉朕承天眷懷俾作神主朝夕砥礪日月永思惟人安化洽是勤惟歲稔時和是冀上靈降鑒豐祉聿臻展禮郊丘申大報之義祇禋宗廟極追孝之誠四海具瞻百神咸秩古者凡有大澤必與天下樂之慶賜遂行無思不備內外文武及致仕官並諸將士等三品以上賜爵一級四品以下加一階宰相及東都留守六軍統軍諸道節度使神策神威金吾六軍都團練防禦觀察使京兆河南尹正員尙書御史臺長官太常卿各與一子官大禮行事官各加一階立仗將士及守本營者共賜物十八萬端匹故尙父子儀與一子五品正員官如已五品以上量與改轉贈太尉秀寶與一

子官張巡許遠南霽雲顏真卿杲卿各與一子正員官天下見禁囚徒罪至流死者各遞減一等徒罪以下一切放免左降官經三考流人配隸效力之類經三周年者並與量移近日州縣官吏專殺立威杖或踰制自今以後有責情決罰致死者宜令本道觀察使具事由聞奏並申報刑部御史臺吐番比虧信約自絕通和邊鎮之間事資備禦因其犯境累獻存囚旣懷恐懼之心復加幽繫之苦允言覆育豈聞華戎應所獲吐蕃生口見在者一切放歸本國仍並差人送至界首量事資遣使得自全應諸道自艱難已來戰陣喪歿及凶死死亡骸骨暴露者長吏各令收瘞奠酌守宰之任弊在數更自令刺史縣令以四考爲限嗚呼朕獲主珪璧十有二年於



茲天地明察罔敢不祇一日萬幾罔敢不慎遷己之過庶無  
私心致人之安實有明志夫祀之馨香在德天之視聽在人  
惟命不常聖有謨訓慶感既集於茲日儆勵方戒於將來冀  
免增修聿懷多福凡百有司所宜同之

貞元九年南郊赦

陸贄

門下朕以寡德屬承大統皇天眷祐俾主兆人懼不克承夙  
夜祇畏緬懷前烈致於升平予心浩然罔知攸濟大小之務  
曷嘗不勤芻蕘之人亦莫不敬慮每存於致理志恆在於恤  
人中宵屢興終食累歎一事乖當怒焉疚懷一夫罹殃惻若  
傷體思與海內同臻大和息其戰爭保其生業降心從眾實  
靡有辭克己利人誠無所吝然以視聽有極思慮難周況乎

長自深宮安於近習損益之理未免過差幽遠之情固多未  
達由是兢兢砥礪悔往修來燭理所患於不明推心庶幾於  
無負日慎一日於今十有五年矣上靈降鑒多士叶誠五稼  
屢豐四鄙不擾方鎮輯睦干戈底寧邊壘繕完殊方款附協  
天地會昌之運實宗社無疆之休慶旣荷於玄功禮有昭於  
大報矧惟霜露之感永切孝思禋燎之儀每勤精意將申誠  
敬其在躬親是與公卿大夫虔奉犧牲恭奠圭璧陳其文物  
薦其馨香類秩於泰壇朝享於清廟率職來助萬邦攸同備  
物致嚴百禮具舉誠慕獲展神人允諾明發永懷慶感斯集  
純嘏所錫豈惟朕躬思俾普天均承惠澤可大赦天下自貞  
元九年十一月十日昧爽以前

云云

其見於官司辨對者亦

並放免官人犯天已贓不可令其卻上已後勿以爲累左降  
官及流人並量移云云 竄謫遐裔冀速霑恩比者準制量移

所司比例申牒屢加般覆累涉歲年旣病淹遲且不均一宜  
令吏部刑部審檢勘本流貶及量移敕旨比類元犯事狀輕  
重月內與處分内外文武云云 從我巡狩涉於艱難錄其忠

勞宜有優異應從奉天扈從至興元府文武官將士等普恩  
之外三品以上賜爵云云 兵興以來垂四十載稅旣煩重人

多困窮因之流離因之凍餒爲人父母實切哀傷誠由德化  
未敷耗斲猶廣每欲蠲復與之小休迫於軍儲有意未就姑  
爾勤恤減其田租惠貸非多深自憫媿天下百姓貞元十年  
地租斛斗應令度支收管者宜並三分放一分如當管無屬

度支斛斗卽減放合送上都十分之一其所放斛斗錢物並  
委巡院官與觀察經略等使計會審勘定數分明榜示百姓  
仍具申奏去年以來所有貸糧種子在百姓腹內者一切放  
免富俗之人在於薄斂必不得已簡則易從自頃削去煩苛  
制爲兩稅旣無他擾頗便於時朕推誠御人所貴存信保此  
誠法期於不踰凡百有司所宜遵守儻求取無節則因緣起  
姦獲利失人殊乖朕意諸司使及諸州府除兩稅外別有科  
配悉宜禁絕近年以來因和市和糴久負百姓錢物並卽填  
還已後官司應有市糴者各須先付價直不得賒取抑配因  
茲斂怨擾人水旱爲災古今不免苟有豐蓄何患凶年屬此  
多虞里閭凋耗姑務求於日給不遑慮於歲儲一穀不成人

則艱食害至方救其傷已多俾無餒殍之憂將在備之而已  
宜委諸州府長官每年以當管迴殘餘羨物穀賤時收糶各  
便隨近貯納年終具有無多少報中書門下兼申考功以爲  
考課升降如有替代各分明交領準前申報若遇災害不稔  
則量事給百姓輒有將充諸色用者以枉準贓罪之其勸課  
百姓自置義倉仍準貞元元年十一月十一日制處分立人  
之道唯孝與忠孝莫大於榮親忠必先於竭節唯爾師長  
校洎乎方岳列藩保乂皇家交修庶績竭節之效旣昭乃誠  
榮親之恩宜洽國典應內外文武清望職事官并節度觀察  
都防禦團練等使父在未有官者量授五品官母在未有邑  
號者各授邑號

云云

佐運之臣納忠之輔功旣存於社稷慶

宜及於子孫故周錫土田漢傳帶礪疇其爵號與國始終固以明報德之恩勸爲臣之義其或時代未遠利澤猶存祠宇已變於荒墟胤嗣不編於仕籍思其人猶愛其樹況莫享之王而不加省錄者乎興滅國繼絕代所以禮先賢也修宗廟敬祀事所以教追孝也化俗歸原此其大端應九廟配享功臣及武德已來將相名節特高有封爵廢絕祀廟無主者宜許子孫一人紹封以時享祀自今已後應有家廟子孫但傳襲爵者並許享祔於廟其有毀賣私廟及買之者各以犯教義論自古聖帝明王忠臣烈士各令長吏以禮致祭書敘明四目達四聰垂拱而理詩稱濟濟多士文王以寧捨己從人故能通天下之志棄瑕錄用故能盡天下之才昔在太宗勤

求理道納諫如響任賢勿疑致俗於太平垂範於永代朕獲承鴻緒追纂往猷書之座隅恆自儆勵朝夕翹想庶聞嘉言夢寐勞懷思得良士凡厥在位所宜共成諸司有便宜陳者各盡所見條流封進事有冤滯政有關遺悉當極言無或隱避詔敕不便於時所司執奏以聞天下有蘊德懷才隱居不仕委所在觀察使表薦當以禮邀致諸色人中有賢良方正能直言極諫或博通典墳達於教化或詳練故事長於著述或精於律令曉暢法理或詳明吏術可以理人或洞識韜略堪任將相委所在州長吏及臺省常參官詳錄行能舉奏仍牒報吏部其所舉人並限來年七月內到京朕當親試緣大

禮職掌行事

云云

元和二年南郊赦

朕聞王者大業孝莫盛於配天國之大事禮莫尊於享帝故  
二儀合祭知上天所子之仁萬國駿奔觀聖人嚴父之道教  
之所設禮極於斯我國家祖武宗文繼天撫運聲名所被車  
書必同承祧而御極業光十聖體元而紀號年將二百朕以  
微眇纘奉昌圖畏此洪業若臨深谷而大事所屬仙寢繼營  
凶德相挺兩隅皆阻淮湖奧壤水旱愆期怒焉疚懷懼不克  
濟既而上天降祐烈祖垂休妖氛盡殄逆節咸伏精禋有以  
相盪善惡有以相資五兵纔試而復藏四氣應序而咸理物  
皆滋茂歲亦豐登百姓之心懽然相與是用致齋三日款謁  
上玄明發不寐祇見烈祖周旋在位陟降是依克配之禮既



展如在之誠增慕嘉此福祐與物惟新式敷頤若之化俾洽沛然之澤可大赦天下罪無輕重常赦所不原者咸赦除之左降官與量移及資復仍聽累敘流移配隸並放還天下應有逋欠在百姓腹內者及京畿今年夏青苗錢稅並放免官酤酒及雜權率並同禁斷淮南江南去年已來水旱疾疫其稅租節級蠲放天下兩稅貞元四年制書已令三年一定委有司舉舊敕商量處置諸道年終旬當宜停刺史錄事參軍並不得擅離州其事類已後制敕速令有司刪定江淮大縣每歲據闕委三省御史台諸司長官節度觀察使各舉堪任縣令不限選數並許赴集台省官及刺史亦令有關先於縣令中揀擇如有能否與元舉人同賞罰復置具員簿以序內

外庶官禁郵驛假託乘勢京兆府諸司色役人各令條流簡  
省天下官吏應行鞭捶責情致死者切令察訪王府六品以  
下官及諸州縣有獄并省處分諸官諸使有要停減者委有  
司商量廢省天下百姓不得冒爲僧尼道士以避徭役其剏  
造寺觀廣興土木者舉前敕處分內文武見任及致仕官  
諸軍將士等以品秩節級賜勳爵文宣王及二王三恪公于  
諸王與一子官仍賜物有差宗子中有才用者委中書門下  
量才敘用故尙父子儀太師晟太尉秀實顏真卿張巡許遠  
南霽雲及配饗功臣與一子官及出身有差至德已來功臣  
未配饗者速令詳定文武常參官及諸道節度觀察使等并  
諸軍使並與父母封及追贈并一子官及出身有差諸軍立

唐文苑英華卷十一  
一  
仗及在本營節級賜物應緣大禮職事官並賜階爵天下諸  
色人中有賢良方正能直言極諫博通墳典達於教化軍謀  
宏遠堪任將相詳明吏術可以理人委內外官各舉所知朕  
親策試天下百姓高年者賜米帛羊酒及版授官封名山大  
川及古聖帝明王忠臣烈士各令以禮致祭

長慶元年正月南郊改元赦

朕聞自昔盛王之所以合天地諧神人莫過乎誠敬致其誠  
展其敬莫重於祭祭之大者莫大於郊廟故必躬行而心奉  
之然後百靈助慶萬國蒙福此帝王之孝也我國家祖功宗  
德立極配天日月所照雨露咸被孝思善繼聖敬允升郊丘  
歲奉於嚴禋宗廟時修其明薦朕以冲昧自獲纘承仰荷瞻

命懼不克享幸天多祐俾歲大穰河朔底寧邊封靖謚及此  
元日至於上辛式遵典禮有事郊廟祇見之夕感慕增懷洎  
大報之辰誠敬彌勵因體元而改號用敷化以覃恩可大赦  
天下改元和十六年爲長慶元年自正月三日昧爽以前大  
辟罪已下罪無輕重咸赦除之唯故殺人在十惡內者及官  
典犯贓不在免限左降官量移近處如復資者任便赴選亡  
官失爵不齒者量加收敘左降官及流人先有官者如已亡  
歿各還本官天下百姓今年夏稅每貫放一百五十文州縣  
應徵科兩稅榷酒錢內舊額須納見錢者並任百姓隨所有  
匹段及斛斗依當處時價送納不得邀索見錢度支鹽鐵戶  
部應納茶稅兼糴鹽價中須納見錢者亦與納時估匹段及

斛斗如情願納見錢亦任穩便永爲常式其公私便換錢物  
先已禁斷宜委京兆府切加覺察應度支鹽鐵戶部三司官  
吏所由欠負元和十三年已前諸色錢物斛斗各委本司盡  
理勘責如是入己隱欺卽準條處分如緣欠折攤徵元保外  
實無可納者宜並與疏理諸軍使亦準此處分兩稅不得別  
有差科刺史如違越觀察使舉奏觀察使事乖格敕刺史不  
得輒受中使及郎官御史奉使所在並不得與人事物諸道  
諸州縣宜委中書門下及觀察使刺史酌量閒劇便可併省  
者具事宜聞奏河北道諸管內宜委本道團定兩稅務令均  
濟河北州縣凋殘戶口未復其官各據郡邑大小量公事留  
置餘並權停應諸道管內百姓或因水旱兵荒流離死絕見

在業產如無近親承佃委本道觀察使於官健中取無莊園  
有人丁者據多少給付便與公驗任充永業不得令有掌職  
人妄爲請射其官健仍借種糧放三年租稅權酒錢已有分  
配百姓又置酒店官酤并諸色推率宜切禁斷亡官失爵放  
還流人有莊田先經沒官被人請射本主及子孫到並委州  
縣卻還天下諸色人中有能精通一經堪爲師法者委國子  
祭酒訪擇具以名聞其大理寺官宜令精擇有志行詞學詳  
明法律者注擬其有課績特殊堪在朝獎者台省官有關宜  
先選擇自今郡守恪奉詔條清廉可紀四考與轉諸道或閉  
糴禁錢自爲條約切宜禁斷其內文武及致仕官三品以  
上賜爵一級四品以下各加一階陪位白身人賜勳兩轉故

尙父汾陽王贈太師晟贈太尉秀實各與一子八品官顏真卿  
杲卿張巡許遠南霽雲各與一子出身武德以來功臣子  
孫量加獎用中書門下及節度使帶平章事各與一子八品  
正員官祖父母及父母並與官封父歿母存者與邑號已贈  
已封者更與追贈及邑號禮儀使大禮使度支鹽鐵使京兆  
尹各與一子出身文武常參官并致仕官及諸道節度觀察  
經略等使及神策等諸軍使父見存者量與致仕官母存者  
與邑號父母亡歿與贈官及邑號東都留守及諸道節度觀  
察經略等使神策金吾六軍將軍威遠鎮國軍等使各與一  
子出身陝州奉天興元功臣更賜勳爵有差身歿未經追贈  
者並與追贈應緣大禮移仗宿衛御樓立仗將士普恩之外

賜勳爵有差仍準舊例賜錢物二十萬四千九百六十端匹  
貫大禮職掌行事官吏及留守等吏賜勳及加階升壇殿行  
事官更特加一階應在城內蕃客等賜物有差常參官及刺  
史有停替及病假解官及終制未授官者委中書門下量才  
進擬其有情願授致仕官者亦聽天下諸色人中有賢良方  
正能直言極諫博通墳典達於教化軍謀宏遠堪任將帥政  
術詳明可以理人者委有司各舉所知限今年十月到上都  
天下百姓高年者賜米及絹帛有差

寶歷元年正月南郊赦

門下朕以眇薄纂承洪構祇見九廟肇祀二儀外飾備物中  
惟盡敬昆蟲水草之寶致豐於蠲潔哀樂和愉之感庶交乎



神明四海駿奔眾祇受職冀下觀而化皆內誠乎心百王之禮樂在陳列聖之聲詩合奏敬極嚴配道備饗親虔奉成式惕焉惴懼而今而後不敢滿假庶無大悔以貽祖考之羞因體元以統歷遂頒恩而大宥可大赦天下改長慶五年爲寶歷元年自寶歷元年正月七日昧爽以前大辟罪無輕重已發覺未發覺已結正未結正繫囚見徒常赦所不原者咸赦除之其官典犯贓不在免限左降官自長慶四年三月三日制後未經量移者與量移近處已經量移者更與量移如復資者卽任依常調選丁憂去任服闋日亦與量移如有親故在上都任於所司陳狀便與處分不必更待本州申請別敕因責授降資正員官未經改轉者亦與進改亡官失爵放歸

不齒者量加收敘縱元敕云終身不齒者亦量與收敘流人  
未到所在及已到者量移近處如已收敘者量才錄用并僧  
尼道士移隸者亦與量移近處得罪人已亡歿家口未許歸  
家者一切放歸如情願住者亦任諸色得罪人中如先有敕  
云縱逢恩赦不在放限者并別敕安置者亦並宜委中書門  
下量事狀輕重級節處分左降官及流人先有官者如已亡  
歿各還本官流貶人所在身亡任其親故收以歸葬仍仰州  
縣量給棺襚優當發遣諸色人中有波累禁錮及反逆緣坐  
等一切並與洗滌常參官及諸州刺史有先因停替及因病  
假解官并終制未授官者委中書門下量才進擬勿令稽遲  
致仕官未經改轉者量改官依前致仕諸軍先禽獲吐蕃生

口配在諸處者宜委本道資給放還本國勿許因循所在停住國家與吐蕃舅甥之好彼此無虞自今以後邊土不得受納投降人并禽捉生口等天下諸州府縣官吏應行鞭撻本罪不至死者假以責情致令殞斃每念於此良增惻然宜委御史台及出使郎官御史等切加察訪仍具事由聞奏澄清教化莫尚乎大學明治心術必本乎六經天下諸色人中有能精通一經堪爲師法者委國子祭酒訪擇具以名聞奏天下州縣各委刺史縣令招延儒學明加訓誘名登科第卽免征徭刑賞不清不足以言理職官不重不足以棲賢開出入之文東上下之手必資慎選庶叶詳平大理寺官屬比來吏部所授多非其才宜令精選有志行文學兼詳明法律者注

擬其有課績特殊堪在朝獎者台省有關宜先選擇一夫不  
獲時予之辜苟有向隅之悲遂軫納隍之慮如聞去冬吏部  
三銓選人駁放者眾或文狀舛錯或書判差池主司守文不  
得不爾旣施惠澤亦在霑恩其長名及雜駁選人如有未離  
京城者委吏部今月檢勘畢除涉踰濫者餘并卻收以地遠  
幾關量才注擬如不情願受地遠官亦不可強之仍速處分  
不得出選限內且者法令懸科彰示大信法旣無守人何適  
從赦令不行因循成俗誕告四方爲虛設開施庶政爲空文  
豈吾德之未明爲有司之見負永言歎息中夜疚懷朕卽位  
之初已有赦令至如捐徹服御止絕地獻限喪葬以息浮費  
禁奇靡以專女工隱實版圖謹守儲備及他徭擅賦閉糴禁

錢吏行姦欺人冒依庇僧道踰濫流貶重輕錢幣利害軍屯  
侵占車馬衣服之制度侵公入己之贓私悉令條流貴欲該  
備頒宣未幾廢格已多或職司惰慢而不能將命或詔命纒  
行而下已不守以此求理不亦難乎其元和已來詔書并長  
慶四年三月三日敕令委廢不行事在朕躬者諫臣極言得  
失無有所隱其在臺閣者左右丞據詔條司額重加分配勿  
容推倚若因循寢廢無所申明及雖曾宣下不能提舉者具  
事由聞奏量加沙汰其在有司州郡者委御史台及分察使  
出使郎官御史度支鹽鐵巡院準前後詔敕切加訪察各具  
犯狀移勘聞奏其本判官及刺史以下必加貶責用懲不恪  
如察舉之司循默自守事狀泄露者亦據容庇量加殿黜仍

並委中書門下重有舉明去年三月三日敕令及今年敕文  
一事以上切加懲責據時限量官吏勤惰具科殿重輕聞奏  
京西北邊上諸軍州鎮自今年以後如有中使及郎官御史  
奉使到所管並不得與人事物應天下典人莊園田店便合  
祇承戶稅本主贖日不得更引令式云依私契徵理組織貧  
入虞氏建官必明黜陟漢朝置吏皆長子孫政成簡用咸登  
右職近代遷除過速資給博繁屬爲時風莫有固志親人之  
職爲弊尤深吐俗土宜未及周悉迎新送故已聞代換更易  
雖遺資望如初善否不分升降莫辨徒爲煩擾無益公私自  
今以後刺史縣令若無所失非滿三周不得除替如理行尤  
異但議就加其有方宜他職灼然要籍者中書門下先具事

由及授上年月奏聽進止滿歲遷代無闕敗者卽與進改盤  
石維城義深麟趾穠華下嫁禮次椒塗搢紳文武之良材執  
事恪居之奉職克參裸獻載叶肅雍亞獻嘉王運終獻循王  
遙等各賜物一百匹夾侍正衣進珪捧珪各賜五十匹亞獻  
終獻正衣各賜物四十匹大長公主嗣王郡主縣主各有賜  
物內外文武官三品以上賜爵一級四品以下加一階合入  
三品五品欠考未合敘者待考足日聽敘斯文未墜降聖克  
昌道逾三代之英化立百王之範象賢崇德垂裔作賓教術  
斯崇憲章無改文宣王二王三恪各與一子官其祠廟委所  
司量加修飾堯稱敦敘周述本枝收族是先睦親斯在皇五  
等以上親三品以上賜爵一級五品以上升一階六品以下

及前資常選散官簡選日優與處分未有出身陪位者每家  
放一人出身應陪位者皇儲五等以上親及太皇太后太后  
三等以下親三品以上賜爵一級四品以下加一階諸親四  
等五等及諸州賀正官并諸色陪位官五品以上加一階六  
品以下及白身人並賜勳兩轉其前資及有出身者各減一  
選締構與王弼成昌運動藏冊府烈冠史編九原推可作之  
風百代凜如生之氣載懷丕績何日敢忘武德以來配饗功  
臣及將相名節尤著長慶四年三月三日制未霑甄敘者委  
中書門下條流聞奏量與優獎故尙父汾陽王贈太師晟贈  
太尉秀實子孫未曾經甄獎者每家與一子正員官元和以  
來有因戰伐死於王事其名節顯著未有優贈者各委本道



節度使條錄聞奏如勘覆詣實當有處分其有骸骨暴露者  
宜令所在埋瘞弘教愛之典爰命推恩念追遠之懷用頒徽  
贈常參官及諸州府長官父母見存未有官封者並量與五  
品致仕官及階并邑號父母亡歿未曾追贈者量與封官及  
邑號已經追贈者更與改贈如贈官已至一品邑號已至國  
夫人者不在此限中書門下及節度使帶平章事者宜與一  
子正員七品官祖文母父母先歿各與追贈經追贈者更與  
改贈官已至一品邑號已至國夫人者不在此限節度使與  
一子正員八品官東都留守度支鹽鐵使觀察處置都團練  
防禦經略招討等使及神策金吾六軍將軍大將軍上將軍  
統軍威遠鎮國軍等使皇城留守各與一子正員九品官京

兆尹特加一階父母亡歿未經追贈者各與追贈職修祀事  
禮奉嚴禋旣洽殊恩宜加異等應郊廟升壇升殿行事官普  
恩之外宜更加一階如合入三品五品者任待考足聽敘尙  
書省三品四品以上中書門下五品以上特加一階便蕃殿  
省給事郊丘顧以忠勤是宜甄獎內行事官三品以上更賜  
爵一級四品以下更加一階內侍省及內坊官四品以上各  
賜勳五轉五品以下各賜勳三轉應從駕至郊廟者普恩之  
外三品以上賜爵一級四品以下各加一階品官白身賜勳  
兩轉環列師營服勞扞衛申威攸屬敷惠是膺神策六軍金  
吾威遠皇城及諸道將士等三品以上賜爵一級四品以下  
加一階無官者賜勳三轉在城神策六軍威遠營左右金吾

及皇城將士應大禮移仗宿衛御樓立仗等普恩之外三品以上賜爵一級四品以下加一階仍準舊制賜物有差神衛將士加一階仍準舊例賜物有差其神策將士應在京畿諸縣者亦各有賜物應緣大禮職掌行事官并修撰儀注及留守副留守倉庫卿等普恩之外三品以上賜爵一級四品以下各加一階虔奉職貢載觀郊禋俾覃錫賚之恩用廣懷柔之義鴻臚禮賓院應在城內蕃客等各有賜物翰林待詔供奉并諸色直見任及前資并員外試官三品以上賜爵一級四品以下各加一階無官者賜勳兩轉導蕃服之誠承帝庭之命忠臣既著勳賞宜周諸道知上都進奏院官在城者各賜勳兩轉應緣大禮四方進表疏及賀正官各賜勳三轉敬

承禮祀贊執豆籩列庶位以觀光酌多儀而中矩誠在儼恪  
理叶褻身郊廟行事齋郎減二年勞室長掌座禮生贊者減  
一年勞無勞可減者便放出身崇玄館行事學生及齋郎禮  
生番考已滿所司緣大禮卻追入行事各減一選國子監學  
生陪位者賜勳一轉中書門下儀制官各特賜一階應緣祇  
供作官直司長上諸州行綱考典兩縣者壽諸色蕃役當上  
在城并量留十二月番者各賜勳兩轉飛龍閑廐宮苑典引  
掌扇內園總監裁接少府將作內中尙武德軍器內外弓箭  
庫等諸司諸使下白身人及無品直司定額長上雜匠巧兒  
黃衣長上監門直長雜使三衛七色引駕細引執扇角手弩  
手曠騎武士天文觀生歷生漏生典鼓典鐘工人樂人主膳

主酪典食胡食手宰手掌閑幕士御士醫士獸醫門僕藥童  
御書手楷書手典書流外行署等各賜勳兩轉尙年貴老所  
以教孝也聳義嘉節所以貞俗也天下百姓高年者上縣以  
上每縣十人中縣五人下縣三人並以縣界年最高者充數  
并孝子順孫義夫節婦先經旌表行義不虧者人各賜米三  
石絹兩匹仍板授上佐縣君並委令長齋米帛就家宣賜訖  
具名本道一時聞奏其米及絹仍令上供數內申報神配峻  
極德稱靈長秩旣升於王公禮合加於牲幣五岳四瀆宜委  
本州府長吏備禮致祭當極豐潔以副如在之誠書稱望秩  
禮著不封仰堯舜之聰明慕文武於方冊遐想忠貞之跡緬  
懷忠烈之風能御大災咸申祀典名山大川及自古聖帝明

王忠臣烈士各令所在以禮致祭亡命山澤挾藏軍器百日  
不首復罪如初赦書有所不該者所司具作條例聞奏敢以  
赦前事相告言者以其罪罪之赦書日行五百里布告天下  
咸使聞知

唐大詔令集卷第七十



唐大詔令集卷第七十一

宋 宋敏求編

典禮

南郊五

大和三年南郊赦

會昌元年南郊赦

會昌五年南郊赦

南郊五

大和三年南郊赦

王者祇見宗廟情極於孝思肅事郊丘義崇於嚴配諸侯駿  
奔以助祭百靈胥蠶而降祥感達神祇斯爲茂範朕以冲昧



獲嗣丕圖兢慄寅畏於今四年屬興伐叛之師未暇燔柴之禮今因南至有事圓丘薦誠敬於二儀申感慕於九廟羣祀來享至誠必通旣陳言以告虔宜覃恩而廣澤可大赦天下自太和三年十一月十八日昧爽以前大辟罪已下罪無重輕常赦不原者咸赦除之惟犯惡逆以上及故殺人官典犯正入己贓不在赦限左降官量移近處已經量移者更與量移縱元敕云終身不齒者亦量與收敘諸色得罪人中如先有敕云縱逢恩赦不在免限并別敕安置者亦並委中書門下量事狀重輕節級處分常參官及諸州刺史有先因停替及以病解免並終制未受官者委中書門下量才進擬其有僞官出身人近已從流者與移近處未處分者減等處分未

發覺者賣官買官人並仰赦書到後一月內於所在納官告  
首得免其罪如不陳首者不在免罪限其京兆府來年夏青  
苗錢宜放一半應度支鹽鐵戶部三司所管諸司官吏所由  
人戶等節級疏理放免天下除兩稅外輒不得科配其擅加  
雜推率一切宜停仍令御史臺及出使郎官御史并在巡院  
嚴加訪察應緣乘輿服御宗廟供須一事以上當從儉約自  
今已後四方並不得輒以新樣難得非常之物爲獻其機杼  
織作織麗尤甚若花絲布繚綾之類及幅尺廣狹不中常度  
者並宜禁斷仍仰天下州府敕到後一月日內所有此色機  
杼一切焚棄犯者以故違敕論諸道先割屬支郡將士如關  
衣糧猶繫使司詳其事理頗非簡便宜委本使差官檢元割

名額及糧賜等第交案與刺史勘會除續準詔敕抽停外據所合給錢米並以當戶合送錢米依實虛折計劃入留州錢米數勘會訖州使各具分數聞奏應緣解補支給並委本州其使司更不得收管方鎮刺史在京除官所須收補隨從人數有司卽爲節限他時替罷仍令隨使停解其方鎮交代之時及知留後官不得輒有補署刺史職在分憂得以專達事有違法觀察使寧不糾繩如聞遠地多未遵守州司常務巨細取裁至使官吏移攝將士解補占留支用刑獄結斷動須稟奉不得自專雖有政能無所施設選置長吏將何責成宜委御史臺及出使郎官御史嚴加訪察觀察使奏聽進止本判官不得匡正及刺史不守朝章並量加貶降若所管州郡

控接蕃夷軍戎之間事資節制須得使司共爲條理卽不在  
此限如聞近年以來京城坊市及畿甸百姓等多屬諸軍諸  
使諸司占補之時都無旨敕差科之際頓異編氓或一丁有  
名則一戶全免宜委本軍本使及京兆府切加提舉準元和  
二年八月京兆府所奏敕及長慶元年制度節文處分諸色  
出身三衛最濫假冒官蔭妄用優勞其三衛三二年且不得  
補待人數盡無如更補委有司條流嚴爲限制每所補注挾  
名替闕如便可停廢亦指實奏聞其六宅十宅諸王女縣主  
宜令每年於選人中擇情願者配尙授官之時量加優賞罷  
秩之後仍減兩選其初婚者更有賜與使備行李如非士類  
不在選限武德以來配享功臣及相將名迹尤著節義顯聞

而子孫陵替官闕廢墜未經甄錄者委中書門下搜訪胤嗣  
特加優獎故尚父汾陽王贈太師晟贈太尉秀實子孫中未  
經甄獎者每家與一人正員官亞獻循王適終獻恭王通等  
夾侍正衣進珪捧珪各賜物有差內外文武及致仕宗室官  
諸親太后三等以上親并應緣郊廟大禮行事進階給賞賜  
各有差

會昌元年五月南郊赦

門下古之令王肇基皇業莫不嚴禋郊廟統和神人將以承  
上天之眷命告下土之率服恪有令典留爲後法是以太陽  
施光調無私之臨照和風扇物樂有截之生靈明察爲先誠  
敬攸屬斯道不遠弘之在予朕以寡昧入奉丕構應三靈之

協慶祇一德以咸美代邸樂推賴元臣之忠力虞琴方鼓冀  
萬國之驩心願以涉道多

下闕

惕若馭朽凜如蹈冰納隍勤

誠勵之懷置器審安危之地苟一物失所時子之深辜粵以  
獻歲吉辰禋祀上帝煙燎既達牲幣克修百神受職而恭敬  
六合承休而霑洽禮成而退慶孰大焉思與公卿大夫內外  
臣庶導迎喜氣同我休嘉變生人之耳目振大化之綱紀立  
號垂統自中形外延八表之洪福敬五始之惟新事天之禮  
既因高以薦誠及物之恩宜順時以布澤可大赦天下改開  
成五年爲會昌元年

會昌五年正月三日南郊赦

門下王者事帝必嚴禋祀之容臣下歸功爰極推崇之義既

鷹顯號式展盛儀因時布和順歲更始前聖垂範後人是遵  
矧以眇身幸逢昌運雖履冰惟懼而涉道未周繫我輔臣洎  
茲列岳內盡交修之志外分共理之憂乃者虜眾乖離部族  
款附救帝子於氈裘之所致名王爲冠帶之臣比夷來朝不  
遠萬里夷貊嚮化克同九州重以上黨狂童竊襲叛迹問罪  
之師旣集元凶之首遂梟廓清亂風洗滌汙俗翦逆弁而故  
都底定竄摩尼而壞法永除由是退惡進賢化行令舉刑姦  
賊之吏黜黷貨之家此皆宗社降靈助成時政豈朕涼德獨  
擅厥功而中外誠臣文武多士累陳懇疏再舉鴻名辭不獲  
從被此虛美是用虔告清廟明禋上玄煙燎所升靈貺如答  
旣展郊禮重申國經宜因行慶之辰誕布惟新之令同我景

福永孚於休可大赦天下

唐大詔令集卷第七十一



人備合...

...

...

...

...

...

...

...

...

...

...

...

...

唐大詔令集卷第七十二

宋 宋敏求編

典禮

南郊六

大中元年南郊赦

乾符二年南郊赦

南郊六

大中元年南郊赦

門下執大象者道陰陽之和帝率土者茂生植之化粵自軒  
昊暨於唐虞側身皇階虛己大寶握金鏡之明耀致玉燭之  
融明惠中國以綏四方欽上元而育兆庶所謂至德勞深企

懷朕荷先帝之眷求奉祖宗之成憲獲撫萬國統和三靈兢  
嚴丕構惕勵神器實賴昊穹嘉享神祇降休東西南朔之聿  
求鳥獸草木之咸若眞宰潛運玄功啟光麥禾豐登兵革得  
息物不疵癘人無夭昏發揚氤氲敷佑寡昧夙夜祇戴訃謨  
經紀尙懼德教之未宣黎元之未泰暴虐之害政奸邪之敗  
常軫念困窮思臻富庶每興赤子之歎不知黃屋之尊爰因  
首政克舉彝典告受命之纂緒展嚴配之盛儀燎柴升聞馨  
香殷薦羣祀昭答百神來享精誠旣達感慶良深是用肆眚  
恤刑改元建號利時者不廢便人者必行俾覃在宥之恩以  
順發生之氣與之更始咸使惟新可大赦天下改會昌七年  
爲大中元年

乾符二年南郊赦

元化序時日月啟貞明之照神功宰物乾坤垂覆燾之仁萬物仰而遂生百王體以爲用朕虔膺天命恭守丕圖懼忝所承慮違厥道每馭朽以思戒若涉川而靡寧自臨御以來夙宵增勵幸而文修政簡歲稔人安賞罰惟公忠厚成俗道漸臻於清淨理將致於雍熙由是敬禮上帝用答天休御端門以崇皇極是彰報本式協體元尙念蠹于政事者未除害於時宜者未革盡施條制以絕根源更表申恩仍行肆眚昔殷湯解網實謂至仁漢文措刑永稱聖理在宥乃爲君之德好生實有國之規今復承以陽春之時布其渙汗之典上符天意旁契人心大禮備陳彝章克舉謀猷廣備聲教遐宣期昭

泰於寰區亦涵濡於動植溥天率土既樂元風四海九州宜  
覃慶澤可大赦天下自乾符二年正月七日昧爽以前大辟  
罪以下罪無輕重已發覺未發覺已結正未結正繫囚見徒  
常赦所不原者咸赦除之惟犯十惡叛逆以上及故殺人官  
典犯人已贓兼情涉巨蠹及持杖行劫并故殺人者雖已傷  
未死已死更生意欲殺傷偶得免者並同已殺人法處分買  
賣毒藥開劫墳墓及刑獄之內官吏用情推勘不平囚成冤  
濫無問有贓無贓並不在原免之限救本睦親古今典制永  
惟負荷常切憂兢應宗室有材可行升淪落在外並委宗正  
卿專加察訪旋申尙書門下量材處分惠安皇太后凡有總  
麻以上親各委所在搜訪聞奏仰酬顧復何擇親疏爰念播

遷重命牽復至於殂謝亦使惠綏用表深仁以彰玄化左降  
官量移近處已經移者更與量移如官至刺史準刺史月限  
例處分諸色官未復資者有司別條疏聞奏如合復資者五  
品以上中書門下便與處分六品以下任依常例選集丁憂  
去任及在憂制受貶者服闋日亦與量移緣責除降資正員  
官及緣累停免未經引用者並量與進改流人及降死從流  
者移近地如已收敘者量材錄用併僧尼道士移隸者亦放  
還勸善懲違朝廷大典苟或隳紊何以聳人其流貶人中或  
有情狀巨蠹物議不容者不在該恩流貶人如已亡歿家口  
欲還及須歸葬者聽隨所便如緣葬事幼弱饑寒不能自濟  
者委所在長吏量給棺槨優恤發遣左降官及流人等有官

者如已歿各還本官亡官失爵連累禁錮者並從洗滌諸色  
流貶人元敕內云雖逢恩赦不在量移之限有自前年十月  
十二日赦書後已經量移五千里更與量移一千里三千里  
外量移五百里情狀難容者不在此限天德五城流人負罪  
素重元敕未經十載不得放還今屬洪恩須令沾及宜減三  
年如年已滿便放還從九月四日降郊禮敕後流貶及引決  
妄稱冤人等并重推覆囚徒並不在此限近日奸險之徒多  
造無名文狀或張懸文榜或譟造童謠此爲弊源合處極法  
應捉獲此凶者準持杖劫人合造毒藥例經赦不原其所得  
文狀準律文於所在焚毀不得徵逋賊以利疲人是協政經  
期爲理本京兆府去年夏青苗錢每貫量放三百文所放之

錢如有司占留色目委戶部準舊例據數交填其咸通十一年以前百姓積欠兩稅斛斗及青苗權酒錢并稅草職田糠麩麩棘等徵收不得空繁簿書前年十一月十二日敕令已令蠲放至今尙未了絕宜令所司速具放免錢物數目分析奏聞如在官典所由腹內者不在此限從咸通十三年夏以前京兆府所欠諸陵園及諸軍諸使錢草斛斗一物以上亦並放免從咸通十三年夏以前京兆府所欠之諸陵掌閑曠騎丁資三衛等資錢亦並放免旬內逃亡人戶尙徵稅物切要條流以安疲瘵委京兆府差官逐縣勘覆其逃亡人戶產業田地未有人承佃者其隨田地苗稅除陌權酒錢及斛斗等並權放三年勒常切招召人戶三年後再差官勘覆據



歸復續卻收稅從咸通十三年以前旬內所欠延資庫戶部  
度支權酒除陌及和糴賑貸錢物斛斗一物以上並宜放免  
內莊宅使巡官及人戶等應欠大中十三年以前至咸通八  
年以前諸色錢六萬二千三百八十貫三百文斛一十萬三  
千七十四石九斗絲二十二萬七千五百八兩麻二千四百  
七十斤草二十六萬五千八百五十五束念其累歲不稔人  
戶貧窮徒有鞭笞終難徵納並宜放免三司所欠錢物已遣  
不徵必慮依違尙猶追擾度支戶部鹽鐵三司應收管在城  
及諸州府諸場監院所欠咸通十年前之諸色錢物斛斗等  
前年十月十二日赦文並令放免所司不得更生節目妄有  
進徵如聞所司官吏緣循至今尙有盤勘都非公事但務生

情歲月轉深奸弊頗甚各委本司差定官一人專句當但據見在文帳檢勘除官典所由請領官錢和糶和市及在場官供招商所由帳內正身見在外其身已亡歿曾經檢責及身見在貧窮家業蕩盡無可徵納者并逃竄捕捉未獲囚繫妻男攤徵保人等仰便據年額請免除去簿書不得更行文牒妄有盤問赦書下後限一箇月內具放免錢物單數分析聞奏如更稽遲本句當郎官當議貶黜典吏等痛加懲斷停解天下州縣官銓司注擬便有選自朝廷何故三司監院官索州縣承迎云是制院恐嚇州縣影占富豪從今後有監院處亦仰州縣常加聽察如監院官有不公不進各申本州行牒本司便如狀事稍重仰專差使送申狀本司事大則任聞奏

兼申中書門下御史臺以憑推勘所冀遞相檢察不敢侵凌諸司更換素有定規近日苟且緣循漸至虛折商徒則獲利倍於往日所司則侵損轉難任持若不條疏積成蠹弊其三司更換宜令準咸通十五年閏四月二十一日度支所奏處分如尙踵前必舉朝典制置新歲酒錢其戶貧破者州縣不令破戶或買柴傭力以納稅令所由司條疏聞奏其河南府界蒿荒地委河南尹於稅錢三分內量與免二分勿令無路營生聚爲草賊其天下州縣除已準元敕徵收兩稅權酒錢茶鹽利旨支米價等分外餘額外加徵別配及販柴炭之人納稅等元無敕文緣本道奏請降敕並仰敕內便皆停罷仍限敕到後二十日內分析聞奏並不罪今日已前之事如又

不已必舉明刑曾經水旱已放徵科或慮緣循須更提舉諸  
道州府或有遭水旱甚處去年夏稅合納苗稅等錢委本州  
府長吏酌量蠲放其咸通十年以前所欠負兩稅錢米等在  
百姓腹內徵收不上者前年十一月十二日赦書已放免仍  
委州府速檢勘蠲放分析聞奏所州縣除前資寄住實是衣  
冠之外便各將攝官文牒及軍職賂遺全免科差多是豪富  
之家致苦貧下準會昌中敕家有進士及第方免差役其餘  
祇庇一身就中江南富人多一武官使庇一戶致使貧者轉  
更流亡從今後並依百姓一例差遣仍委方鎮各下諸州準  
此檢點江淮運米本實關中祇緣徐州用軍發遣全無次第  
運腳價妄被占射本色米空存簿書遂使倉庫漸虛支備有

闕緣循弛慢全自職司宜令轉運使速具條疏分析聞奏纔及春緩便須差清強官吏節級催驅嚴立科條須及舊額苟或踵前容易必舉朝章郵傳供須遞馬數目素有定制合守前規河南館驛錢物至多本來別庫收貯近日被府司奏請一同支用遂使遞馬欠缺料糧不充憲司又但務緣循都不提舉宜令東臺館驛使述具條疏分析聞奏東都留守所管兵數不少無非市肆之人緩急抽差全不堪用防禦官闕尤非所宜須有條疏以革前弊宜令速分析見在闕額并老弱人數聞奏應緣州府經費悉有舊規近者不務在公惟思潤己或聯遇豐稔亦不貢羨餘若小有水旱卽競有論請致朝廷事力轉困全在臣下誠敬何乖自今以後如輒將上供一

錢物支用並當加譴責不在原貸之限如本道實有災荒積  
歉爲甚眾所知者不在限例朝廷徵發兵士固非獲已道途  
頓遞勞費至多又聞節級須得人事裨補每縣不下五千文  
盡配疲人深可哀憫自今後但供備無缺輒不得踵前率配  
如或違犯縣令本曹官重加貶降人吏決杖配流其都知兵  
馬使以下並以枉法贓論立法之始當在必行諸處本置作  
坊祇合制造干戈兵甲及進獻供需昨徐方用軍諸道多無  
兵器內庫般送填塞道途如聞作坊惟使雜伎弓甲之匠十  
無一人打築卽惟務精新器甲則動忘修整自節察至刺史  
皆爲信臣不能委典條疏各宜自知改革諸道兵士非惟  
額不堪兼又軍將數多一員敵官健數分又占官健當直遣

納課錢其弊數重深要除蕩仰諸道各自檢點如或本自書  
題又無功效非軍中子弟空請職名者並皆疏理其軍將等  
各遣納課錢者並準入己贓結罪科斷東畿之內留守影占  
最多稍富者不揀城外村中盡有一虛名文牒犯罪者亦稱  
此名府縣若追但行牒卻取事小則推勘了牒送事重者則  
與勒停委留切不得遮奪免致鬪傷其在京諸司亦仰各依  
此例如被抑屈但具奏聞且徵兩稅自有常期苟或先自催  
驅必致齊民凋弊蓋緣機織未畢唐錢未終便須令賣縑繒  
賤糶斛斗致使豪首迫蹙富戶吞侵須更申明俾其通濟諸  
州府如有不依旨限先期徵稅者長吏聽奏進止縣令錄事  
參軍並停見任書下考不在矜恕之限關要之外聲教至遙

每念疲人尤多橫役訪聞五嶺諸郡修補廨舍城池材石人工並配百姓至於糧用皆自贖持既不折稅錢又全無優恤永言凋瘵實可憫傷自此委節度觀察使接借本錢并刺史百計收抬運轉別立修造案名額遣幹濟官主持常令急遂修整勿遣大段摧毀永放百姓額外差科已債卹人斯爲盛美遐荒賤吏尤可哀矜先於咸通五年梧州糴十萬石米停貯數載之後方令盤送邕交如聞卑濕損傷雀鼠耗折計其所言六萬石餘累載以來亦頗校料徵納主持軍將十餘輩攤保累數百家或科決不輕或資材蕩盡典男鬻女力竭計窮盡虛挂簿書徒爲羈繫宜從寬宥用釋宸憂其所欠米委度支一時放免邕南交趾屯駐兵士全無運糧俾其足食湖



南江西管內諸郡出米至多豐熟之時價亦極賤綱官若得錢收糴每斗必有盈餘道途既可經營輸納當無敗闕緣於官倉領米刮鐵平量既濶資陪便致吞侵耗折所以經年累月舳艫相交江路多有沈淪軍食常有欠缺自今仰所在長吏切須饒濶綱官并令交付腳錢仍與善價糴買嚴示刑賞不使稽遲邕州安南晏州見屯諸道行營兵士合食錢米等三處兵數近四萬日食錢米費用極多全在諸道州使巡院饋運相繼免失支持近日以南中爲警急抽差皆務循將相同常事蓋緣地遠差綱無利皆託以鹽鐵戶部指揮未得分明申報逗遛圖延界分或有未本色皆云額望收錢及綱官進發之時欠腳錢途路侵盜錢米所至稽停每發一綱便

逾星歲致令供軍使頻申三處月限不相接續所司前後申  
奏行牒督責非不丁寧蓋緣祇有科貶之名曾無必行之令  
遂致全無凜懼但務緣循若不嚴立科條必恐轉成敗失其  
諸道州使巡場監院所合般送南中供軍錢米各委所在長  
吏併發綱船以濟軍用仍委逐道節度觀察防禦經略刺史  
差最大判官一人專判校料其巡場監院官場官自專催促  
各令設法何當克濟軍需如依前逗遛不早送申遂使邊軍  
糧儲欠闕供奉不得相續便據所欠錢米處勘還重加貶責  
如州使官吏巡場監院官能罄誠節慎選行綱支遣及至舟  
船繼至卽重議酬獎河東向管延資庫斛斗五十萬石每歲  
出陳入新之際勞擾州縣百姓至多未有用時積爲深弊宜

令本道節度使點檢除道路與邊鎮接近緩急堪般充軍糧者卽且準前其餘深僻州縣並速條疏分析聞奏義倉斛斗本防災年所貯積歲多翻成侵害又差重丁大戶充倉督子弟主管凡節察及監軍使刺史縣令到任仍須一一斛量差役鄉夫數重勞擾每一量覆欠折轉多主掌之人貼家竭產生靈塗炭州縣困窮從今後宜五年一度變換便糶貨收錢入冬卻糶仍委本道監使常加訪察如有上下蒙蔽欺隱破除聞奏但不要初上之日須重復量每度擾人朝廷大弊在於令不行祇如經水旱州三降敕命不許將逃亡規攤見在人戶遭災水旱處有於見在戶兩倍徵或至三倍又近年以來節度觀察使或初到任或欲除移是正二月百姓饑餓之

時公遣二日條先抽徵見錢每一千文令納三四百此時無  
不兩倍三倍生生舉債至有賣男女以充納官行彼貪心殘  
我赤子從今後有如此者必舉極法以謝生靈諸道事例差  
使結歡去信出於官中答幣歸於私室駐留供備迎送優豐  
進獻不副常程結好卻爲公事惟奏欠缺不思本源且鄰境  
結懽何必事需厚幣來者若爲私物去者何必官錢道慕空  
門名爲釋子若非精進何以住持應城及諸州府僧尼元敕  
人數外不得轉令私度如有死亡等闕卽任據人數填補年  
終聞奏待五年限滿時每收補皆須選擇有戒行事業者勿  
令濫雜之輩於此容身天下刑獄申到法寺及刑部有經數  
年不得了絕省寺人吏競邀賄賂出入律文大理寺及刑部

官僚不親公事致使一案之內半死獄中從今後委中書門下每日點檢如停滯者大則貶降小則停勒其刑部郎中員外切須選擇亦不得輒冀奉使以望賄財有文案則併送對廳行貨財則獨收私第準咸通十一年條流諸州刺史三千里外限三十箇月二千里外限二十七箇月近者勒刺史到郡交代則可以計到郡月滿便且除移如新除者則須待月限滿除替其餘內外諸官並依咸通十一年條流如有有限未滿錯替者任經中書門下過狀便與追敕有過失須替則不在此限兩省官本令先任四赤令貴欲知人疾苦近者纔三五月則替何殊罔生空倍擾人從今後宜以十五日爲限兩畿令府判司從前吏部注擬頃年或除三人兩人近者乃至

除望縣令及部尉等中書自不存體百司何以仰瞻其進馬  
十年本限五年方滿近者旋替年深致使入仕多門三銓無  
缺從今後如或用年深缺補人兵部郎官必議貶降詞科出  
身士林所重本貴踐歷漸至顯榮近者惟扇澆風習務躁進  
麻衣纜脫結綬王畿是前十年宦途今來半歲遷授頗爲訛  
弊須與重明自今以後進士及第並須滿二周年後諸道藩  
鎮及戶部度支鹽鐵及在京諸司方得奏請如未及奏官限  
內有攝職處一任隨牒攝其宏文館集賢院奏請直館校理  
並依此日限如出身後諸道奏已請初銜未得兩考者輒便  
奏畿內尉充在職兩考方得依資除官改轉其授使下官先  
自有月限資序一一須守舊規不得超越比擬準咸通十四

年十月九日敕文處分關節取受本身值財素來貧無亦多舉債祇緣從來赦文未甚分明賞罰若行必當止絕自今以後如有入錢買官納銀求職敗露之後言告之初取與同罪卜射無捨其錢物等並令沒官送御史臺以贓罰收管如是波斯番人錢亦準此處分其櫃坊人戶明知事情不來陳告所有物業並不納官嚴加懲斷決流邊遠庶絕此類用其清平樂官乞託本自人情既越舊規過於債負雖累有明敕尙不遵行兩巡不切追禽教場又不鈐轄從來上於方鎮近日方鎮與樂官人事轉多別有遷除例皆乞覓喧呼門戶擁塞階庭以此得官人不願除授自今以後除方鎮外兩巡使及諸司外巡切加禽捉如有此色具送本司枷禁勘責痛加懲

斷以絕此端近年以來風俗奢侈不營根本各務誇張及第  
登科傾資竭產屋地悉踰於制度喪葬皆越於禮儀爲冊使  
弔贈之臣或爭財貨乞賜章服之類不畏慙羞致使兒童或  
輕朝列念茲靡愧常行嗟歎委中書門下次第條疏稍爲改  
革輸其常賦尙慮不充更或加徵其何以濟近年百姓流散  
稅錢已多如聞自朝廷用軍告終百姓正稅外每貫紐四十  
五十文已是數年至今不矜放黎甍冤抑腿脊瘡疾所徵錢  
則將充諸色支分所添兵則逐月銷減每思此事深可歎傷  
其天下緣用軍奏加紐貫之外更有敢徵一文其長吏及判  
官錄事參軍並準入已贓仍不在以官贖之限其鄭州庚道  
尉在任日加徵稅錢如或卻徵亦依此例衡鏡之司去留雖



切念其羈寓須與商量支部選人如聞累年駁放至多或文狀舛錯或書判差遲有司守文不得不爾況選人例迫饑寒遠來調集頻年被駁情實可矜既遇鴻恩合與優假委吏部檢勘去冬選人若有此色除非身名踰濫及欠選欠考外並以此遠殘缺取其情願者特與卻收注擬諸道奏官奏者緣要缺舊人無理從今後并須分明其不理罪愆先加懲責有罪空替則是惠姦其奏前資及見任多有虛豎頭銜用錢計會從今以後有官吏更奏者便仰兼遞告身進奏院以憑點檢如告身不到不在奏行其虛銜所奏祇與九品初任仍奏狀內須是三代官諱及鄉貫戶頭年幾餘各依資奏請河北三道不在此限守土長人切資士族品流混雜必害生靈刺

史縣令如是本州百姓及商人等準元敕不令任當處官不  
繫高下蓋以事體不可兼又十室九親多有憎愛一切阻礙  
公事難行近年此色至多各仰本道遞相檢察當日勒停百  
姓商人亦不合爲本縣鎮將若有違越必舉典刑裨補除任  
實在獎勞奏請繁多則爲過濫咸通七年赦書條流諸州府  
奏軍將官不許除上佐如有功須獎卽於本管內除授仍不  
得占優厚處近日諸道不守條章或分兩三度奏來所貴前  
後不相見但行計會貴得人多從今以後諸道軍將官并限  
七月表到京令之初行宜武臣之敘進據所合奏人數一表  
令如有別勞效者卽待明年七月不得兩度貫行欺隱忠在  
社稷誓著山河或盟府舊勳或闕宮配食宜舉賞延之典用

彰義烈之名故尙父汾陽王贈太師晟贈太尉秀實贈司徒  
顏杲卿太師真卿張巡許遠南霽雲子孫中未甄獎者每家  
與一人正員官安金藏頃申忠節實異等倫合爲酬庸以勸  
義士如有子孫與一人正員官武德以來配享功臣名迹尤  
著節義顯聞子孫凌替官闕廢墜未經甄錄者委中書門下  
搜訪後嗣量加優獎慶連宗室義重維城洎文武羣僚恪恭  
事務用酬勞績宜降恩私亞獻撫王紘榮王愐等各賜物一  
百匹夾侍正衣進珪捧珪各賜物五十匹亞獻終獻正衣各  
賜物四十大長公主嗣王郡主縣主各賜物內外文武見  
任及致仕官三品以上賜爵一級四品以下加一階合入三  
品五品欠考未合敘者待考足日聽敘封孔聖之後加虞賓

之恩式表崇儒以明繼絕文宣王之後及二王三恪各與一  
子官其祠廟委所司量加修飭義在奉親道惟睦族將申孝  
敬合示恩榮皇五等以上親三品以上賜爵一級五品以上  
加一階六品以下及前資常選散官簡選日優與處分未有  
出身陪位者準會昌五年正月三日赦書處分應陪位皇五  
等以上親三品以上賜爵一級四品以下加一階四等親並  
諸色陪位者五品以上加一階六品以下及白衣並賜勳兩  
轉其前資及後出身各減一選皆懷追養之願盡有榮終之  
心授任封崇式光存歿常參官及諸州府長官父母見在未  
有官封者並量與五品致仕官及階并邑號如有官者量與  
進改如官已至五品以上者卽與五品階父母亡歿未經進

贈者量與追贈及號邑任榮輔相寄重藩方泊於親軍咸秉忠節俾令追贈以顯榮名中書門下及節度使帶平章事者各與一子八品正員官祖父母父母亡歿各與追贈其有已經追贈者更與追贈節度使與一子正員九品官東都留守度支鹽鐵使觀察處置都團練防禦經略招討使皇城留守各與一子出身先亡歿未追贈者各與追贈虔奉典章肅供祀事宜覃鴻澤以獎勞能禮儀使大禮使京兆府尹各與一子正員九品官應郊廟升壇行事官溥恩外中書門下尙書省御史臺三品以上特加一階四品以下各加一階如入三品者量減四考入四品者量減三考入五品者量減二考足日聽敘其合選人與減一選內行事者官三品以上賜爵一

級四品以下更加一階內侍省及內坊官四品以上各賜勳  
五轉五品以下各賜勳三轉應從駕至郊廟者溥恩之外三  
品以上賜爵一級四品以下各加一階白衣賜勳兩轉泣列  
牙爪職掌警衛念其宣力宜加酬勞

唐大詔令集卷七十一



唐大詔令集卷第七十三集

宋敏求編

典禮

東郊

敕親祀東郊德音

東北郊

太極元年北郊赦

明堂

詳議明堂制度詔

頒明堂制度詔

親享明堂制



明堂災告廟制

親祀明堂赦

社稷

親祀太社詔

升社稷及日月五星爲大祀敕

東郊

敕親祀東郊德音

皇王之化載籍所陳將奉天而育物必順時而行教雖禮文則著而親祀蓋闕朕自膺寶歷且踰二紀承宗社之蕃社賴公卿之協心萬物阜成庶務簡易思與黎獻臻夫仁壽是用敦本復古將必稽於月令謀始作則先有事於東郊宜因展

禮之辰式布維新之澤其天下見禁囚應犯死罪者特宜免死配流嶺南以下罪並放還朕每念黎甿弊於征戍親戚多別離之慘關山有往復之勤何嘗不惻隱於懷寤寐增歎所以別遣召募以實邊軍錫其厚賞使令長往今諸軍所召人數尙足在於中夏自能罷兵旣亡金革之事足保農桑之業自今以後諸軍兵健並宜停遣其見鎮兵並一切放還京圻之內雜役囚繫言念劬勞豈忘優恤頃者櫟陽等縣地多賊鹵人力不及便至荒廢近者開決皆生稻苗亦旣成功豈專其利京兆府界內應雜開稻田並宜散給貧丁及逃還百姓以爲永業書不云乎不作無益害有益語不云乎奢則不遜儉則固緬惟前古嘗折在心將斲雕以爲樸期上行而下從

自今以後王公並不得以珍物進獻所司應緣宮室修造務從節儉但蔽風雨勿崇堊飾至如金玉器物諸色雕鏤朕緣蕃客所要將充宴賞今流俗之間遞相倣效既損財於無用仍作巧以相矜敗俗傷農莫斯爲甚並一切禁斷以絕浮華古者鄉有序黨有塾將以宏長儒教誘進學徒化人成俗率由於是斯道久廢朕用憫焉宜令天下州縣每一鄉之內別各置學仍擇師資令其教授其諸州鄉貢進士每年引見訖並令就國子監謁見先師所司設食學官等爲之開講質問疑義且公侯之嗣皆稟義方學禮聞詩不應失墜容其徼幸是長慢遊如聞近來弘文館學士緣是貴胄子孫多有不專經業便與及第深謂不然自今以後宜一依令式考試朕之

爵位惟待賢能雖選士命官則有常調而安卑遁迹尚慮遺才其內外八品以下官及草澤間有學業精博蔚爲儒首文詞雅麗通於政術爲眾所推者各委本州本司長官精加搜擇具以聞薦發生之月實在於行仁利物之心莫先於作善先斷捕獵令式有文所由州縣宜嚴加禁止其每年千秋節日仍不得輒有屠宰道釋二門皆爲聖教義歸弘濟理在專崇其天下觀寺有絕無文冠道士僧尼者宜量觀寺大小度六七人簡擇灼然有經業戒行爲鄉閭所推仍先取年高者凡百卿士朕之同德宜勉修所職以合時令禮有施惠義兼行賞實爲其時固不可缺亞獻口王與宜賜物一千匹終獻頴王璵賜物五百匹邠王守禮寧王獻各五百匹慶王棕以下

及長公主郡縣主二王後京文武官賜帛各有差天下諸州  
侍老宜令所由長官量賜酒肉務在優養令朝廷無事天下  
太和美景良辰百官等任追勝爲樂宜卽佈告中外咸使聞

知

開元二十六年正月

太極元年北郊赦

門下朕聞大事在祀禮極乎郊丘大德曰生道存乎赦宥故  
至誠斯感允接神明之休盛典聿修必敷雷雨之施古先聖  
帝躬祠后土所以崇兼載之功配博臨之義有虞氏之合禘  
徧於山川成周氏之從祀逮於林澤西漢汾陽之時東洛翠  
嬀之墀雖制猶未備而道有可觀曹魏以還數百餘載蓋設

儀而不復或誠信而未孚有其廢之莫得能舉我國家之受命也承百王之季啟三統之元高祖神堯皇帝膺錄受圖繼天立極太宗文皇帝弔人伐罪南征北怨是用拯生靈於塗炭登人物於休和高宗天皇大皇帝惟睿作聖垂衣而理大聖天后受託從權當宇而化中宗孝和皇帝允恭克讓守文御武能致刑措於變時雍朕以眇身恭荷丕構常恐政理乖中風雨愆期惕慮周於萬戶疚懷時於一物幸乾坤交泰宗社降靈氣無疵癘之災物遂生成之性呼韓慕化侍子來庭月支請職名王入貢大荒同軌瀛海無波俯循涼德載懷寅畏故以歲首肅事禋宗爰選令辰親祀方澤采黃圖之舊制定黑時之前基心謀取則於禮經宥密同規於詩頌三祖登

配羣望畢從咸池之舞在列合鍾之管斯應祥風入候當乎  
八變之殷瑞日揚暉屬乎三獻之始臣工助而胥悅兆庶觀  
以相趨誠敬克申感慶交集頃緣郊籍已肆赦胥貸宥之道  
未應累降但精享云缺旣曠代而方循福釐所被思寰宇之  
同沐宜因大典式暢洪恩可大赦天下改太和元年爲延和  
元年五月十三日昧爽以前大辟罪以下咸赦除之其十惡  
及劉誠之胡太宰徒侶官人受贓並不在赦限文武官預大  
禮各賜勳一轉桓彥範敬暉崔元暉袁恕張柬之等特還其  
子孫實封二百戶大酺五日

### 明堂

詳議明堂制度詔

朕聞合宮靈符創鴻規於上代太室總章標茂軌於中華雖  
復質文殊制奢儉異時然其立天中作人極布政施教歸之  
一揆朕嗣膺下武丕承上烈思所以答眷上靈事遵孝養而  
法宮曠禮明堂寢構永言大禮朕甚懼焉宜命所司與宮學  
士等考覈故事詳議得失務依典禮造立明堂制度儀文獲  
申於茲日思誠展敬永垂於後昆其明堂制度宜令諸曹尙  
書及左右丞詳議

頌明堂制度詔

首出萬物實顯崇高之位周覽八紘無違嚮明之道合宮聽  
朔闡黃軒之茂軌靈符通神數帝勛之景化殷人陽館青珪  
備禮姬氏元堂彤璋合獻雖運殊驪翰時變質文至於立大



中建皇極軌物施教其歸一揆泊乎西京初歷駿政逾繁東漢開基舊章猶闕考圖汶上僅存公玉之儀度室圭躔纒紀中元之製三方鼎據祚傾於金馬五胡塵擾道喪於蒼鷲自此相仍時經板蕩遂使陟配之典久淪於緜載端辰之化允屬於隆平朕恭膺寶命肅奉瑤圖昧旦求衣仄影忘食賴上玄垂鑒宗社降靈幽明宅心中外禔福封金秦嶺昭景聖之鴻勳勒石九都成文考之先志功標偃革時會委裘固可以作化明堂顯榮太室口口之歷既表於嘉名布政之宮式崇於美制是用求中測景取則陰陽考廣表於裁圭定高卑於置臬傍羅八柱周建四甍加宇儀天疏基象地窗闌齊布應格並興導璧水以環階應旋衡而結極重阿複道用循測管

之模上圓下方仍準分磬之數木工不琢土事無文豐約折  
衷經始勿亟句芒候序入春圃而司儀蓐收戒時下秋園而  
奉職事符神造鉤繩之用畢陳義協子來釁落之期非遠將  
以肅禋清祀展殷薦於皇靈施號法宮鳴休聲於大帝百神  
執賢咸尊孝享之風萬國來庭其覩太平之政缺文斯備大  
禮聿修制作之規可依別敕宜頒示天下永垂來葉

親享明堂制

昔軒黃御歷朝萬國於合宮丹陵握符咨四岳於衢室有虞  
輯瑞總章之號既存大禹錫圭重室之名攸建殷人受命置  
陽館以辨方周室凝圖立明堂以經野用能範圍三極幽贊  
五神展尊祖之懷申宗祀之典爰從漢魏迨及周隋經始之

制雖興修廣之規未備朕以庸昧虔膺厚託受寄於綴衣之  
夕荷顧於仍几之前伏以高宗往年已屬意於陽館故宗輔  
之縣預紀明堂之名改元之期先著總章之號朕於乾封之  
際已奉表上陳雖簡宸心未遑營構今以鼎郊勝壤圭呂名  
區處天地之中順陰陽之序舟車是湊貢賦攸均爰籍子來  
之功式遵奉先之旨夫明堂者天子宗祀之所朝諸侯之位  
也開乾封之奧策法氣象之運行故能使災害不生禍亂不  
作眷言盛烈豈不美歟比者鴻儒禮官所執各異咸以爲明  
堂者置三里之外七里之內在國陽明之地今旣俯邇宮掖  
恐瀆靈祇誠乃布政之居未爲宗祀之所朕以京邑之地去  
宮遙遠每月所居因時享祭常備文物動有煩勞在於朕懷

殊非所樂今故裁基紫掖闔宇彤闈經始肇興成之匪日但  
敬事天地神明之德乃彰尊祀祖宗嚴恭之志方展若使惟  
云布政負屐臨人則茅宇土階取適而已豈必勞百姓之力  
制九筵而御哉誠以獲執蘋蘩虔奉宗廟故也時既沿革莫  
或相遵自我作古用適於事今以上堂爲嚴配之所下室爲  
布政之居光敷禮訓式展敬誠來年正月一日可於明堂宗  
祀三聖以配上帝宜令禮官博士內外明禮者詳定儀位務  
從典要速以奏聞

垂拱四年  
十二月

### 明堂災告廟制

朕君臨紫極撫育蒼生期普大澤之流爲啟無疆之福神宮  
之後式建尊容頌緣內作工徒宿火誤燒麻主遂涉明堂然

朕昧且憂勤不遑寢食慮虧至道未副天心內省厥躬伏增  
寅畏槐省棘署百僚庶尹宜竭乃誠各揚其職內作工匠可  
卽放還刺史縣令風化之首宜矜恤鰥寡敦勸農桑均平賦  
役稽察姦盜里閭妖訛尤當禁止遠近冤訟令早決斷見禁  
囚徒速爲處分老病之色征鎮之家亦令州縣加意撫存諸  
作非要切者量事宜停所司供進之物並宜節減其長才廣  
度沈迹下僚據德依仁韜聲幽閉懷王佐之器乏知己之容  
宜令京官職事五品以下及刺史上佐縣令等各準狀薦舉  
仍遣內文武百官九品以上各上封事極言正議無有所

隱

親祀明堂赦

朕聞惟天爲大所以上序三宗惟帝爲尊於是宏開七廟故  
知肇興衢室爰申宗祀之規乃建明堂式廣嚴禋之禮莫不  
八窗四達分氣候於炎涼複廟重簷定尊卑於昭穆實爲國  
之洪訓乃經邦之茂典我國家聖祖神宗重光累葉道軼羲  
農之上功侔造化之初冠今昔而居尊掩寰區而作大朕承  
天撫連纘聖開元披鳳曆而乘時握龍圖而建極春秋變易  
每增霜露之心日月推移倍切烝嘗之思然而城臨丹鳳清  
廟久安水控元龜神基未立金輿往幸空展望於瑤祠玉輦  
來巡實幸親於碣石三川帝里八水皇州豈都邑之相誇而  
郊畿之有謝所以交風輿壤還開候雁之庭揆日名區更置  
馴龍之室巍巍紫座無虧薦鮪之途奔奔丹宮遂得獻羔之

所加以總章霧闢重屋煙披懸曉日於梅梁挂晴虹於桂棟  
是以用斯圭璧奠彼牲牢鳴孤竹之管簫奏空桑之琴瑟爰  
於附享之日乃至禋宗之辰景色殊常煙雲冠古或凱風南  
至吹喜氣而分輝或靈雨東來引祥雲而合享固可以作樂  
崇德殷薦上帝而碧海遙澄覺三爍之霧捲丹霄至廓看九  
野之塵清祖宗之靈貺昭然宇宙之神心可見虔誠旣展盛  
禮斯宏宜覃作解之恩以廣奉先之德但赦者小利而大害  
始泰而終否是小人之幸非君子之福今歲以來頻敷渥命  
徒長僥倖愈犯憲章非所以宏獎風化發揮名教深慮無知  
者因茲獲罪有識者緣此知幾遐思管仲之簫緬想吳漢之  
說恐負不構慨然長想昔孔明相蜀王猛佐秦咸以數赦爲

言俱稱肆眚非便朕惟新闡政方事澄源期望古而裁規且  
修今而布澤伏以禮申崇耐情展泰禋式流曠蕩之恩兼明  
懲勸之道可大赦雒州境內天下諸州見禁囚徒應致死者  
特宜免死配流者入徒餘並原宥在京文武三品以上賜爵  
一級四品以上各加一階內外文武九品以上賜勳一轉皇  
親嗣王仍特許佩金魚袋內外職事官三品以上及四品清  
官並中書門下五品官父已亡者並量加追贈自宏道以前  
繼任三年已上及秦府晉府僚佐四品以上并食實封功臣  
雖經罪責不致破家子孫無任京官者特宜優與一官英府  
周府舊寮五品以上官子孫亦宜準此天下百姓爲父後者  
各賜官爵一級大醜三日

神龍元年九月



社稷

親祀太社詔

厚地載物社主其祭嘉穀養民稷爲元祀列聖垂範昔王通訓凡建邦正位莫此爲先爰暨都邑逮於州里率土之濱咸極莊敬所以勸務農本修始報功敦序教義整齊風俗末代澆淳祀典虧替時逢喪亂仁惠弛薄壇壝缺昭備之禮鄉閭無糾合之訓朕握圖受歷菲食卑宮奉圭璧於尊嚴潔粢盛而禋燎尙想躬稼勵精治本永言享祀宜存德紀是以吉日惟戊親禮太社率從百寮以祈九穀今旣南畝俶載東作方輿州縣置禮宜盡祇肅四方之民咸勤殖藝隨其性類命爲宗社京邑庶士臺省羣官里閭相從其尊社法以時供祀各

申祈報兼存宴醕之義用洽鄉黨之歡且立節文明爲典制  
進退俯仰登降折旋明加誨勵遞相勸獎齊之以禮有恥且  
格布告天下卽宜遵用

武德元  
年正月

### 升社稷及日月五星爲大祀敕

敕祭之爲典以陳至敬名或不正是相奪倫況社稷字佑百  
官蒙其福日月臨照五星協其紀兆人允賴下土式瞻旣超  
言象之外須極尊嚴之禮列爲中祀頗紊大猷永言允當必  
在刊革自今以後社稷日月五星並升爲大祀仍以四時致  
祭庶昭報之誠格於上下欽崇之稱合於典則



唐大詔令集卷第七十四

宋 宋敏求編

典禮

籍田

貞觀三年籍田詔

籍田制

停籍田雕飾農器詔

元和五年罷籍田敕

開元二十三年籍田敕

九宮貴神

親祭九宮壇敕

唐文獻皇帝集卷之十四  
親祭九宮壇大赦天下敕

嶽瀆山川

封華岳爲金天王制

冊東海神爲廣德王文

令盧從愿等祭岳瀆敕

令嗣鄭王希言分祭五岳敕

令嗣許王瓘祭東岳敕

禁驪山樵采敕

雨澤頻降昭報山川敕

令關內諸州長官祭名山大川敕

遣官祭霍山敕

立終南山祠敕

蕭昕等分祭名山大川制

雜祀

天地宗廟外祭用少牢詔

置壽星壇敕

升風伯雨師爲中祀敕

五方帝祝文勿稱朕詔

親拜風伯雨師祝版詔

條貫祀事敕

籍田

貞觀三年籍田詔

周宣在位已墜茲禮近代以來彌所多缺朕祇承大寶憲章典故今將履千畝於近郊復三推於舊制宜令有司式遵典禮

貞觀三年正月十八日

### 籍田制

門下棗盛所以奉神祇籍田所以助人力既義率乎下而敬在其中是爲先農存乎大典故周宣不復於古而虢公致諫漢文能修其制而班史稱美朕自御極以來動咨故實惟是千畝未展三推匱缺神因人降交相移歲庸不在此良以憮然今星紀既周土膏將動去農祥而不日考帝籍之以時朕其親耕以實御廩宜令禮官博士詳擇典故有司速卽施行

### 停籍田雕飾農器詔

古之聖王臨御天下莫不務農敦本寶儉爲先蓋用勤身率  
下屬東耕啟候爰事籍田將欲勸彼蒸人所以執茲耒耜  
如聞有司所造農器妄加雕飾殊匪典章況紺轅縹輓固前  
王之有制崇奢尙靡諒爲邦之所疵靜言思之良用歎息豈  
朕法堯舜重茅茨之意耶其所造雕飾者宜停仍令有司依  
農用常式卽別改造庶萬方黎獻知朕意焉

乾元二  
年正月

### 罷籍田敕

敕朕以東郊籍田禮之重者爰擇吉亥用祀先農上以供粢  
盛下以勸稼穡式展三推之意敢辭四體之勤亦旣草儀方  
將肅事再思理本旁采眾詞江淮水旱之餘河朔師旅之後  
宜寬物力以濟蒸元況當三農休息之時有百司供具之費



道途灑埽暴露勤勞惕然在懷是用中止雖前有成命皆已  
施行而重煩吾民則無固必其來年正月十八日籍田禮宜  
暫停於戲夫聖人無心以徇百姓朕亦虛已用圖大中苟事  
未宜則改而求當凡百卿士期悉余懷

元和五年十一月十九日

### 籍田赦書

門下昔者受命爲君體元立極未有不謹於禮而能見教於  
人朕其庶乎有慙作者方冊存而可舉舊章絕而復尋自古  
所行無一而廢將以上乞靈於社稷下蒙福於黎元朕茲精  
誠天寶降鑒今嗣歲初吉農事將起禮有先於耕籍義緣奉  
於粢盛是所嚴畏敢不敬事故躬載耒耜親率公卿以先百  
姓遂終千畝謂敦本之爲邇何布澤之更深宜有順於發生

俾無偏於行惠可大赦天下自開元二十三年正月十八日  
昧爽以前大辟罪以下罪無輕重已發覺未發覺已結正未  
結正囚繫見徒咸赦除之其犯十惡死罪不在赦限其餘死  
罪特宜配流嶺南遠惡官至流者亦量貶與遠官典配諸軍  
效力計贓至徒仍不得重令卻上天下諸州捐免處稅地先  
矜放其非捐免處有貧乏未納者並一切放免代糧種子開  
元二十一年以前並宜放免京兆河南府秦州百姓有諸色  
句徵及違懸欠負亦宜放免其在官典及倉督等腹內者不  
在免限天下色役典爰及支用務令節減并諸色資賦先令  
中書門下均融減省宜準前敕速卽條奏捐免州稅戶錢米  
納并七等以上戶租先來處分五色資錢課未納灼然不辦

者並放至蠶麥秋收以來贖納捐免州逃兵健兒承前訪捉  
不獲合取籍田充替自資送軍程期逼迫頗亦辛苦並放蠶  
麥以後登遣仍令所司預與軍州計會諸州征行人並令州  
縣存恤其父行人有父母年七十以上者委本道采訪使檢  
責取負牒報本軍卽放還本貫軍司據闕募取健兒充替行  
人及丁防有身亡者爲造棺槨遞還本鄉諸州應發防丁在  
本貫一千里以上比來除正課之外給一丁充資多不濟辦  
空更量與資助兩京城內今年所有雜諸夫役並宜放免應  
須使役以諸錢和雇取充農桑之時不得妨奪州縣官長隨  
時勸課孝子順孫義夫節婦旌表門閭鰥寡惇獨不能自存  
畚加優恤天下侍老百歲以上版受上州刺史九十以上申

州刺史八十以上上州司馬其七十以上所由仍量給酒肉  
各令存問亞獻皇太子鴻賜物二千匹終獻慶王潭賜物一  
千匹邠王守禮等各賜物一千匹忠王浚以下各賜物三百  
匹夾侍正衣進珪汝陽郡王濬等各賜物二百匹皇太子夾  
侍正衣等各賜一百匹裴輝卿等自其翊贊誠有忠益邠賞  
以序等數須優宜各與一子官仍各賜物三百匹二王後各  
賜物一百匹長公主各與一子官仍各賜物二百匹嗣王郡  
主縣主各賜物一百五十匹京文武官見任及致仕並諸色  
陪位官一品賜物八十匹二品七十匹三品六十四匹四品五  
十匹五品四十四匹六品三十四匹八品九品二十段節度副大  
使三都留守京兆尹各一百匹四大都督府長史諸道采訪

使各八十匹諸賜物應兩給者從一處給其耕官及侍耕官各賜勳兩轉丞相蕭嵩與一子官仍賜物二百匹攝九卿諸候等各與一子出身仍賜物一百五十匹侍耕執牛官各賜物一百二十匹升壇行事官修禮儀官及判官等更賜一階應入三品五品官階相當減四考聽人攝司徒信安郡王禕禮儀章綰旣不敘階禕與一子官賜物二百匹綰與一子出身賜物一百五十匹其升壇及兼禮儀兩兼從一加階應與一子官及出身者若無子聽過與周親供奉及押階不升壇并壇下及助耕執牛官別敕差中書門下差定人數等從階合入三品五品階至考未足者待考足日聽非待考者賜勳兩轉未承別賜者各賜一轉知頓使賜物一百匹修壇場長

官屯官撰玉冊官各賜物八十匹書玉冊官賜物五十匹管籍田縣令賜物六十匹京文武官朝集使官充十道采訪使并判官諸道節度使及諸道通表使判官新除五品以上官未赴任都畿縣令見任陪位者三品以上轉爵一級四品以下加一階皇親諸親及九廟子孫不入等陪位者并外文武官九品以上各賜勳諸蕃入廟入賀正蕃客應陪位者共賜五十匹節級付分南北衙門行從宿衛齋官及武官押當有職掌并諸色雜職掌并隨耕公卿從官等各賜勳一轉萬騎及飛騎見當上者各賜一轉其宿衛齋宮者加賜物三段仗內待訪諸色從人各賜物三段曠騎當兵角弓手拏手官馬主見當番及留帖人掌閑幕士駕士供膳習馭工人樂人見

當有上職掌并庶人應耕者各賜物三段齋郎禮生贊者行事者並減兩年勞無勞可減者齋郎放出身禮生贊者選日稍優與分三衛七色見當番并流外行署及番官見上有職掌者各賜一轉淮南洛陽縣陪位父老各賜物五段近壇百姓各免今雜差科宗廟致享務存豐潔禮經沿革必本人情邊豆之薦或未能備物服制之紀或有未通宜令禮官學士詳議具奏朕自臨天下二紀於茲不敢荒寧日加兢業而災眚未弭黎人未康若有由而然則在余之責有能直言極諫者具以狀聞每渴賢良無忘鑒昧頃雖虛佇未副廣求其才有王霸之略學究天人之際知勇堪將帥之選政能當牧宰之舉者五品以上清官及將軍都督刺史各舉孝悌力田鄉

閭推挹者本州長官勘實有才堪應務者各以名奏政事久  
歷清資終始著稱年漸衰邁情有可矜量予改職依前致仕  
宗子中有才行著聞比尙沈屈者委宗正勘實奏聞唐元兩  
營立功官任折衝並改與中郎其亡失官爵量加收敘五岳  
四瀆名山大川及自古聖帝明王忠臣良相並宜所在長官  
以禮致祭赦書有所未該者所司比類聞奏亡命山澤挾藏  
軍器百日不首復罪如初敢以赦前事相告言者以其罪罪  
之都城內賜酺三日赦書日行五百里布告遐邇咸使聞知

九宮貴神

親祭九宮壇敕

敕惟神之主必恭禋祀率先之訓義在躬親朕欽若昊穹子



育黎庶思通明靈之德以洽和平之理是修缺典咸秩無文  
如在之誠久陳於郊廟懷柔之志亦徧於山川況九宮所主  
百神之貴上分天極下統坤維陰騭生靈功深亭育故式昭  
新典肇建明祠將以爲人載祈孚祐宜協元辰之吉用申大  
祭之禮可以立春日朕親祭九宮壇仍令中書門下與禮官  
等卽詳定儀注奏聞

天寶三年  
十二月

親祭九宮壇大赦天下制

孫 逖

門下九宮之祀百代莫修豈日給之不暇將神靈之有待朕  
當展君臨握圖纘業每聽政中昃疇咨讜言觀書側衣以求  
故實勵精爲理三紀於茲上荷宗廟延祥克開厥後下賴股  
肱協德以致雍熙而麟鳳龜龍近遊郊藪山海梯航遠輸琛

費乘時來之休運恢惟皇之遠圖是以園丘方澤之儀升中告類之禮無典不舉靡神不懷恭惟九宮明祀尙缺載深兢惕用建靈壇爰以元辰親執奠獻協青春發生之慶祈黔黎啟祐之福今至誠式展大禮云備瑞景和風神心如答無疆之福豈獨在余非常之澤宜覃率土可大赦天下自天寶三年十二月二十五日昧爽以前大辟之罪無輕重咸赦除之其十惡死罪造僞頭首不赦立法務從於寬簡任事必量於齒力比者成童之歲卽挂輕徭旣冠之年便當正役憫其勞苦用惕余懷自今以後天下百姓宜以十八以上爲中男二十三以上成丁又任土作貢先標程式或非所有不免貿遷事旣非宜理難經久并應徵課稅及支遣諸色物或期程之間

遲違非便並委所司與朝集使商議取便處置奏聞諸軍行人遠爲邊扞修短之分雖有定期從役而終良深軫念其有陣前亡歿骸骨未還本貫令節度使給棺櫬遞歸又防邊禦寇實謂難勞貧戶單丁同茲存養便令差遣去住難堪自今以後應差行人家無兼丁不在取限自古聖人皆以孝理五帝之本百行莫先移於國而爲忠長於長而爲順永言要道實在人宏自今以後令天下家藏孝經一本精勤誦習鄉學之中倍增教授郡縣官吏明申勸課百姓閒有孝行過人鄉閭欽服者所由長官其實以名薦其有父母見在別籍異居虧敗名教莫斯爲甚特宜禁絕勿使更然并親歿之後亦不得令有分析郡縣切須勒令在籍推行自今以後如有不友

不恭傷財破產者宜配磧西用清風教朕惟熙庶績博訪逸人豈惟振拔滯淹以期於大用亦欲褒崇高上將敦於薄俗虛佇之懷兼在於此其有高蹈不仕遁迹工園遠近知聞未經薦舉者委所在長官以禮勘送又崇德追遠式閭封墓用旌前烈以協大猷自古聖帝明王名臣烈士陵墓有頽毀者宜令所管量事修葺仍明立標記禁止樵采天下侍老百歲以上賜帛五段粟三石八十以上帛三段粟二石仍令郡縣長官存問給付亞獻太子禕宜賜物二千匹終獻慶王悰一千匹正衣夾侍各五百匹親王各三百匹新封建郡王及國公各一百匹賢妃三百匹長公主各三百匹公主各二百匹嗣郡王各一百匹中書門下三品竭心翊戴宏益實多各與

一子官如已授官量與一階轉內外文武官三品官以上賜  
爵一級四品以下各加一階一品賜物七十匹三品以上六  
十匹五品以上賜物四十匹六品以下二十段諸節度使各  
賜物一百匹三京留守及二王後各八十匹采訪使各六十  
匹諸蕃客共賜二千匹其唐元功臣締構之初竭其忠款錄  
功念舊情所不忘普恩之外更加一階其身歿者各賜一官  
皇親五等以上及九廟子孫諸親三等以上未有出身者並  
放出身其前資者選日稍優與處分見任者更賜勳兩轉應  
天下賜醕三日赦書有所未該者所司類例聞奏宣布中外  
咸使聞知主者施行

封華岳神爲金天王制

門下惟岳有五太華其一表峻皇居合靈興運朕惟恭膺大  
寶肇業神京至誠所祈神契潛感頃者亂常悖道有甲兵而  
竊發仗順誅逆猶風雨之從助永言幽贊寧忘仰止厥功茂  
矣報德斯存宜封華岳神爲金天王仍令龍景觀道士鴻臚  
卿員外置越國公葉法善備禮告祭主者施行

先天二年八月二日

冊東海神爲廣德王文

維天寶十載歲次辛卯三月甲申朔十七日庚子皇帝若曰  
於戲四瀛宅日百谷稱王望祀之禮雖申崇名之典猶缺惟  
東海浴日浮天細來宏往善利萬物以宗以都朕嗣守睿圖  
式存精享神心允穆每協休徵今五運惟新百靈咸秩思崇

封建以展虔誠是用封神爲廣德王其光膺典冊保乂寰宇  
永清坤載敷佑邦家可不美歟惟南海蕩滌炎州包括溟漲  
涵育庶類以成厥德惟西海汜濫疏名清晏表德成茲潤澤  
莫彼金方惟北海限蠻阻裔實□坎德含奇蘊粹實曰天池  
下闕

命盧從愿等祭岳瀆敕

敕五岳視三公之位四瀆當諸侯之秩載於祀典抑惟國章  
方屬農功頗增旱暵虔誠徒積神道未孚用申靡愛之勤冀  
通能潤之感宜令工部尚書盧從愿祭東岳河南尹張敬忠  
祭中岳御史中丞兼戶部侍郎宇文融祭西岳及西海河瀆  
太常少卿張九齡祭南岳及南海黃門侍郎李暉祭北岳右

庶子何鸞祭東海宗正卿鄭繇祭淮瀆少詹事張昭祭江瀆  
河南少尹李暈祭北海及濟瀆且潤萬物者莫先乎雨動萬  
物者莫疾乎風睠彼靈神允稱師伯雖有常祀今更陳祈宜  
令光祿卿孟溫祭風伯右庶子吳兢祭雨師各就壇場務加  
誠敬但羞蘋藻不假牲牢應緣奠祭允宜精潔

開元十四年正月

### 令嗣鄭王希言分祭五嶽敕

敕歲之豐儉固係於常數天之感應實在於精誠頃者按以  
陰陽求之推步至於今歲不合有年朕乃齋心妙聞懇祈玄  
德靈徵不遠丕應用彰果獲西成頗爲善熟蓋至道儲祉惠  
於蒸人亦羣臣翊贊錫以昭假宜令光祿卿嗣鄭王希言祭  
東岳太子詹事嗣許王瓘祭北岳太常卿韋縉祭西岳衛尉



卿嗣吳王祇祭南岳宗正卿濮陽郡王徹祭北岳所司卽擇  
日錄奏其四瀆及名山大川或遠近不同各委所在郡長官  
便擇吉日致祭務崇嚴潔以稱朕懷

令嗣許王瓘祭東岳敕

敕務農勸穡雖用於天道人和歲稔實賴於神休頃者春夏  
之交稍愆時雨收穫之際復屬秋霖慮害農功每祈孚祐遂  
得百神降德不易先朝禮神以明德恭事以嚴禮進其位號  
崇其典策用三代之樂金石必備盡九州之味籩豆有加俾  
國之大臣每歲頌祀則執事而有恪亦莫不寧也朕纂戎八  
載外寇未平多廢舊章尙勞戎備巡狩之事有曠於虞書封  
禪之儀尙慙於漢史臨命地方敬守以時致祭而事之不親

誠有不達所以分遣八使禱於羣望各供於事以服官常宜令某官等分祭名山六川仍敕有司備具禮物敬陳明薦無失正辭羣望效靈既不爲災仍多歲熟幽贊之道普洽於生人昭報之儀式遵於典禮宜令太子詹事嗣許王瓘祭東岳所司郡長官備禮致祭移陳蠲潔以達精誠

禁驪山樵采詔

敕驪山特秀峯巒俯臨郊甸上分艮位每曳雲而作雨下出蒙泉亦蕩邪而蠲瘵乃靈仙之攸宅惟邦國之所瞻可以別於羣望紀在咸秩自今以後宜禁樵采量爲封域稱朕意焉

開元四年正月十九日

雨澤頻降昭報山川敕

爰自首春有愆時雨朕憂勤祀獻精禱靈祇遂蒙九玄垂福  
百神效祉膏澤頻降嘉生繁育晻彼山川能興雲雨報功享  
德祀典存焉諸州府所管名山大川宜令當處長官設祭務  
盡誠敬以昭典禮

開元十四  
年六月

令關內諸州長官祭名山大川敕

敕朕爲人上未嘗自逸每勤於政思致豐年而去冬以來雨  
雪微少竊恐春事有害農功是用齋心躬自申禱神歆允答  
甘澤遂流豈朕之微誠敢當丕應蓋天之鑒察惠及生人詩  
不云乎無德不報昭賽之義豈可闕如其關內名山大川及  
有靈祠宜令所由長官擇日致賽務令豐厚各盡誠潔以副  
朕懷

遣官祭霍山敕

三代之初皆有神降鑒其德也天寶啟之恭惟王業之初師  
及霍邑堅城未下大將阻兵連雨經旬糧儲不給白衣父老  
忽詣軍門稱霍山之神謁大唐皇帝云東南取路八月雨止  
助帝破敵盡如其言巖巖霍山九州之鎮興雲致雨功已洽  
於生人親道輔德力更宣於王室朕纘承大寶應受洪庥臍  
鬻之間誠明可接永言幽贊茲謂有孚謂天命神據我斯意  
宜令禮儀使判官司封員外郎辭頡卽往霍山致祭正詞以  
薦稱朕意焉

立終南山祠敕

每聞京師舊說以爲終南山興雲卽必有雨若常晴霽雖雲

他至竟不沾濡况茲山北面闕庭日當恩顧修其望祀寵數  
宜及今聞都無祠宇巖谷口湫口在命祀終南山未備禮秩  
湫爲山屬捨大崇細誠所謂闕於興雲致雨之祀也宜令中  
書門下且差官設奠宣告恩禮便令擇立廟所選日以聞爰  
命有司卽時建立

開成二年

蕭昕等分祭名山大川制

敕有天下者祭百神蓋存乎統法也山川出雲而致風雨列  
在明祀其來久矣春秋傳曰水旱癘疫之不時於是乎祭之  
致其誠信與其忠敬精意以享則神明保佑命之古之岳瀆  
秩視公侯以其所生者繁所濟也廣鎮厚地而不動振滄海  
而不洩如是正直長發其祥百王相承五方共賴既有利物

之澤宜隆報享之文

雜記

天地宗廟外祭用少牢詔

國家草創日不暇給凡厥禮儀鮮能盡備且生人未乂凋殘實多至於畜產思致蕃息祭祀之本皆以爲身窮極事神有乖正直殺牛不如禴祭明德卽是馨香望古推今祭神一揆其祭園丘方澤宗廟以外並可止用少牢宜用特牲時和年豐然後允循常禮

武德元年十月

置壽星壇敕

德莫大於生成福莫先於壽考苟有所生得無祝之今有上封者言仲秋日月會於壽星以爲朕生於是月欲以配社而

祭於義不倫且壽星角亢也既爲列星之長復有福壽之名  
豈惟朕躬獨享其應其天下萬姓寧不是懷蓋秦時已有壽  
星祠亦云舊矣宜令所司特置壽星壇恆以千秋節日修其  
祀典

開元二十四年十月

升風伯雨師爲中祀敕

敕六氣不愆所以成歲百神咸秩必也正名况風伯雨師濟  
時育物蕃茲動植溥暢生靈厥有茂功當崇於昭報謂之小  
祀頗闕於彝倫去載諸星以爲中祀永言比義固合同升自  
今以後其風伯雨師並宜升入中祀仍令諸郡各置一壇因  
春秋祭祀之時同申享祀用刊前典之謬以致蒼生之福

五方帝祝文勿稱朕詔

郊祀之義本於至誠制禮定名宜從事實五方配帝上古哲  
王道濟蒸人禮著明祀論善計功則朕德不類統天御極則  
朕位攸同而祝文稱朕以祭既無益誠敬有黷等威此豈朕  
禋祀聰明昭格上下之意前京兆府司錄事參軍高佩上疏  
其理精詳朕重變舊儀訪於卿士申明大義是用釋然宜從  
改正以敦至禮自今以後五方配帝祝文勿稱朕餘禮如舊

親拜風伯雨師祝版敕

風伯雨師等升爲中祀有列祖成命況在風雨惠切蒼生今  
雖無文朕當屈己再拜以申子育萬姓之意

條貫祀事詔

王者受天地之明命繼祖宗之鴻業所以祇服大事致誠嚴



禮盡其孝敬之心崇其郊祀之禮必在匪懈不忒粢盛豐潔  
古今丕訓無易於此朕嗣位十載恭惟萬邦務三時以厚生  
睦九族以修教每勵薄德汙茲小康中宵內懼愧不克稱實  
天地之睠祐宗社之威靈思欲罄其精誠奉以昭報豈聿懷  
之敢望實如在而齋心如聞近歲有司因循將事不恪牲牷  
無滌敬粟乏容鼎俎雖陳薦享多缺祠官或怠於齋肅胥吏  
有至於喧呶戲禮瀆神莫斯爲甚永言重事用惻深衷自今  
以後太廟郊社齋郎先事前一日委監察御史仔細點檢如  
有替代非正身者當時禁身推問聞奏當重科懲旣責躬親  
須議優獎其齋郎委中書門下商量與減選應緣祠祭官下  
至齋郎及樂人胥吏等致齋日有博奕飲酒喧呼爭競者委

御史臺糾察聞奏其牲牢準禮循行之際合視肥瘠之宜近日相承臨時取辦既乖誠敬頗失舊章委太僕寺準禮令處分如無本色牛羊速具聞奏至於酒醴醢醢簋簠膳羞各委本司準禮令切加提舉凡有廟塲所宜肅敬縱云隙地豈廢修築如有耕墾藝植者亦仰御史臺糾察聞奏攝祭公卿雖約官品將朕誠敬必在得人委尙書省差定之時稍加慎選其祭器禮物中如有欠缺及濫惡須填補改張者委太常宗正光祿太僕寺少府監諸司速具條疏聞奏仍委中書門下卽與疏理處分於戲禮崇明祀神享至誠上下苟無其僞必異於備物由是怵惕齋莊致祠咨爾中外宜悉朕懷

具錄諸事由是科舉漸革廷尉各衙中候宜悉類對

與與無罪級次其進德崇興張輔平王勳士平許濟其後

五其並承封爵之極溫諸臣歷具新滿朋卷後廷中書門下

其等器豐懽申暇育大知又並照更與散更諸香委大常宗

陳官益祿賜賜等亦五諸人交尚書省送致之西宮散財

許與設而折難想願善衣而而史等除禁國典續知是順

本同舉舉合時飲對舉其官諫對視宜報好難云胡也宜

長收據本會牛羊移具開表至然再舉舉其也其也各

日限承詔知罪禮禮而備其也夫蕭章奏大對寺舉舉合

唐大詔令集卷第七十四

唐大詔令集卷第七十五

宋 宋敏求編

典禮

太清宮

太清宮行禮官改用朝服并停祝版敕

太清宮行事改爲獻薦制

宗廟

令所司與禮官議宗廟制

令公卿議太原建寢廟詔

增置太廟九室詔

常薦

宗廟薦享別奠樽俎詔

太廟五享令宗子攝事詔

令兩京各日享廟詔

享太廟料外置牙盤食詔

禘祫不廢常享詔

祧遷

遷獻二祖詔

親享

令皇帝親謁太廟詔

明皇卽位謁太廟赦

親謁太廟錫賜宗支庶官

親享九廟制

太清宮

太清宮行禮改用朝服并停祝版敕

敕尊祖奉先必在於崇敬辨儀正禮所貴於緣情伏以太聖  
玄元皇帝御氣升天長生久視體重玄而不測與元化而無  
窮真容屢見寶符仍集恭惟孚祐實表常存比者太清宮行  
事官皆具冕服爰及奏樂未易舊名并告獻之時仍陳策祝  
既非事生之禮豈是降神之儀但真俗殊倫幽明異數理有  
非便亦在從宜自今以後每於太清等宮行禮官宜改用朝  
服兼停祝版其告獻辭及所奏樂章朕當別自修撰仍令所  
司具儀注奏聞

太清宮改爲朝獻薦獻制

春秋致享用存昭敬祝史陳信必在正辭苟名謂之或乖於  
上下而非便經稱崇事易載顯若所以展祗肅明等威朕欽  
崇道本嗣守丕業每懷如在之誠敢忘奉先之旨禮或未達  
情實匪寧承前有事宗廟皆稱告享茲乃臨下之辭頗虧尊  
上之義靜言斯稱殊爲未允自今以後每親告獻太清宮太  
微宮改爲朝獻有司行事爲薦獻親告享宗廟爲朝享有司  
行事爲薦享親巡陵爲朝拜有司行事爲陵拜應緣諸事告  
宗朝者改爲奏其郊天后土及祝云敢昭告者並改爲昭薦  
於乎式崇專禮庶表因心宣爾中外令知朕意

天寶九年十一月

### 宗廟

令所司與禮官議宗廟制

朕以不造惇惇在疚日月如流星靈浸遠霜露所感觸目殞  
絕宗廟之制有國大典皇運之始且事因循今山陵有日遷  
耐非遠宜允舊章永世作則可令所司與禮官等詳議奏聞

貞觀九  
年九月

令公卿議太原建寢廟詔

昔周監二代崇文武之典禮漢紹三王尊高光之功烈斯固  
有國之彝訓不刊之令範高祖太武皇帝聰明神武叡聖徇  
齊應天順民撥亂反正德侔造化道濟區夏靖率土之沸騰  
拯黔首之塗炭一戎大定四海宅心制治定之禮作功成之  
樂天地交泰品物咸亨聲教遐暨休徵雜沓侯甸要荒之長  
輻湊彙街龜龍麟鳳之祥光照圖史然猶日慎一日推而弗



居邁邈古之鴻名踰前王之邳治朕以寡昧丕承景業緬維  
永往攀慕終天思弘尊親之道庶展罔極之思竊惟太原之  
地肇基王迹事均豐沛義等宛譙理宜別建寢廟以彰聖德  
詳觀漢典抑有成規但先皇遺旨務在儉約虔奉訓誡無忘  
啟處宜令禮官與公卿等詳議以聞

貞觀九年  
十二月

### 增置太廟九室詔

朕聞王者乘時以設教因事以制禮沿革以從宜爲本取舍  
以適會爲先損益之道有殊質文之用甚異且夫至德之謂  
孝所以通於神明大事之謂祀所以虔於宗廟國家握紀命  
歷重光累盛四方由其繼明七廟可以觀德朕嗣守丕業祇  
奉睿圖聿懷昭事罔不卹祀嘗覽古典爰詢廟制遠則殷周

事異近則漢晉道殊雖禮文之不一固敬嚴之無二朕以爲  
立愛自親始教人睦立敬自長始教人順是知政以道存禮  
從時變將因宜以創制豈法古而限今況恩以降殺而疏廟  
以遷毀而廢雖式瞻古訓禮則不違而永言孝思情所未足  
享嘗則止豈愛崇而禮備有禱而祭非德盛而流永其祧室  
宜列爲正室將使親而不盡遠而不祧廟以貌存宗由尊立  
俾四時式薦不間於毀主百代靡遷匪惟於始廟所謂變以  
合禮動而得中嚴敬之典克崇肅雍之美茲在又兄弟繼及  
古有明文今中宗神主猶居別處詳求故實當宁不安移就  
正廟用彰大典仍創置九室宜令所司擇日啟告移遷

開元十年

六月

常薦

宗廟薦享別奠樽爵詔

朕以寡德嗣守宗祧雖明發有懷肅恭禋祀踐霜露而興感  
奉洗腆以增哀每惟宗廟至敬虔誠裸享而止情有未安思  
革舊章用崇嚴配管子曰禮者因人之情緣理而爲之節也  
故三王五帝禮制不同損益隨時期於通變況罔極之思旣  
展於茲辰終身之慕情深於是日豈可以因循禮經乖違敬  
誠自今以後宗廟享爵及簠簋登鉶各宜別奠其餘牢饌並  
依常典

乾封元  
年六月

太廟五享令宗子攝事詔

宗廟致敬必先於如在神人所依無取於非類深惟至理用

切因心其應太廟五享於宗子及嗣王中揀擇有德者令攝三公行事異姓官吏不須令攝

開元二十七年二月

### 令兩京各日享廟詔

朕肅承宗祀不敢怠違誠有未安夙夜祗惕頃時有事太廟兩京同日告享雖虔卜吉辰俱遵上日而義深如在禮或有乖自今以後兩京宜各別擇吉日告享

天寶三年四月

### 享太廟料外置牙盤食詔

敕祭神如在傳諸古訓以多爲貴著自禮經腓脛之儀盡昔賢之尚質甘旨之義亦孝子之盡誠旣切因心方資變禮其自今以後享太廟宜料外每室加常式一牙盤仍令所司務

盡豐潔

天寶五年四月十六日

禘祫不廢常享詔

禘祫之禮以存序位質文之變蓋取隨時國家系本玄宗業承聖祚重熙累盛旣錫無疆之休合享登神思宏不易之典自今以後每神並於太清宮聖祖前設位序正上以明升陟之禮欽若玄宮下以盡虔恭之誠無違正道比來每緣禘祫時享則停事雖適於從宜而禮或虧於必備以後每緣禘祫其常享無廢又奉先追遠禮式昭虔崇福展敬義在因心自今以後獻祖廟宣皇帝莊皇帝先祖光皇帝光皇后忌日宜令京城寺觀一日設齋太祖景皇帝景烈皇后我祖元皇帝元貞皇后忌日京城三日行道

遷獻二祖詔

國之大事式在於明禋王者孝享莫重於殷祭所以尊祖而正昭穆也朕承列聖之休德荷上天之眷命虔奉牲帛二十有五年永惟宗廟之位禘嘗之序夙夜祇慄不敢自尊是用延訪公卿參稽典禮博考羣議至於再三敬以今辰奉遷獻祖宣皇帝神主懿祖光皇帝神主祔於德明興聖皇帝廟太祖景皇帝正東向之位宜令所司備禮務極精嚴祇肅祀典載深感惕咨爾中外宜悉朕懷

貞元十年

親享

令皇帝謁太廟詔

諾昔重華嗣德格於文祖高宗陟后至於神宗蓋所以敬履

端之元申孝享之道皇帝初嗣大寶允膺休命歡洽神靈慶  
溢宗社宜躬親祀典用展肅雍可以今月四日謁享太廟所  
司準此

光天元  
年十月

明皇卽位謁太廟赦

門下繼明嗣德王者所以承天尊祖奉先聖人所以崇孝敬  
上之禮著乎重華月朔之祠襲乎文命猗歟作頌發流濬哲  
之祥清廟升歌思表配天之業歷選前載可得而言我國家  
首出開元繼文膺統七代觀德至道洽於生人三后在天世  
裕光於後嗣太祖皇帝道超寰表功軼帝先名言不測於乾  
行仁智不遺於日用累讓神器非以黃屋爲尊俯膺大寶蓋  
爲蒼生屈志黎民於變淳化斯登載懷脫屣疇咨菲薄竭讓

德之至天睠弗回陳拜首之誠沖襟逾邈遂以寡昧祗踐宸  
居循顧紹庭載深寅畏爰撰初吉躬展肅雍虔肆獻之儀申  
大號之典神保之享斯洽介福之道攸宜億兆同歡人祇同  
慶恭承聖訓沛此洪恩可大赦天下

親謁太廟錫賜宗支庶官制

朕聞理莫大於孝惟所以通神明事莫大於祀所以謁宗廟  
顧此薄德獲承丕緒恭虔夙夜弗敢違寧去歲爰命有司增  
營太室尋以匠者功就饗人禮舉雖是效是則率由舊章而  
不躬不親曷盡誠敬粵自河洛旋於京師聿修齋祭致用蠲  
潔屬羣方駿奔庶位咸理裸奠式受感懷載殷聖靈在天若  
享精意伊爾王公卿士下逮黎蒸道存念茲惠乃錫類七廟



元皇帝以上三祖枝孫恐有失官序者宜各與五品京官皇祖妣諸家有子孫今在選敘者量加甄擇內外官三品以上有廟者各賜絹三十匹以修祭服俎豆緣謁廟亞獻邠王守禮終獻宋王憲各賜三百匹夾侍岐王範薛王業各賜絹二百五十匹自餘行禮及供奉三品以上賜一百六十匹四品一百四十四匹五品一百二十四匹六品一百匹七品八十四匹八品六十四匹九品四十四匹鹵簿六引官各減一等押仗官又減一等攝官依本官給有兼充諸使者加一等兩京文武官并朝集使諸方道表一品七十匹三品六十四匹四品五十四匹六品七品四十段九品三十段從者加一等皇親諸親準品等禮儀置頓營幕使各賜物一百段副使八十段判官及修定

儀注官各減三分之二行所州縣刺史上佐縣令等官各准  
行從官與賜其給賜人應兩處以上者從一多給唯有廟官  
之賜聽兼給謁廟有所修造專當官及當頓官始末不絕者  
各賜一半上考知頓州各免一年租及地稅傍州緣頓供承  
者亦準此行事齋郎及權補充者各賜物十段升階者各賜  
物十五段三衛飛騎萬騎并仗內無品人等賜五段十月正  
蕃衛士等各賜三段緣道路及置營幕損百姓苗麥者宜令  
州縣檢量優還價直餘應得而制書缺載者所司類例以聞  
開元六年  
十二月

親享九廟制

崇建宗廟禮之大者聿追孝享德莫至焉今宗以立尊親無

遷序永惟嚴配致用蠲潔棟宇式崇禋奠斯授願茲薄德獲  
承禋祀不躬不親曷展誠敬宜用八月十九日祇見九室

開元

十年  
五月

唐大詔令集卷第七十五

唐大詔令集卷第七十六

宋 宋敏求編

典禮

省侍

元和元年正月輟朝侍膳敕

元和十一年皇太后寢疾權不聽政敕

大中元年積慶皇后寢疾權不聽政敕

大中二年太皇太后寢疾權不聽政敕

咸通六年太皇太后寢疾權不聽政敕

服紀

代宗行再朞服詔

義安太后服制敕

陵寢上

營卜

九嶷山下陵詔

充奉

厚奉建陵詔

大行太后山陵修奉事敕

扈從靈駕

太祖允百官表不親至山陵詔

隨靈駕赴陵所詔

親至華陵詔

答百僚不赴華陵詔

省侍

元和元年輟朝侍膳敕

敕朕聞爲子之道莫大於寧親順色之方必先於養志此文王之孝曾氏之心每聆遺風常所景行伏以太上皇帝怡神閒館追想大庭將保靜延休滌慮寧體初陽變候舊恙愆和寢食之間有不安節夙夜憂灼豈遑寧居而內奉庭闈冀承安否嘗藥視膳且不暇於衣冠一日萬幾固有虧於聽覽庶政關決遂闕躬親恐中外具寮未悉余志起今月十八日以後權不聽政故茲宣示當體朕懷

正月

元和十一年皇太后寢疾權不聽政敕

朕聞事親之禮問安雖限於晨昏爲子之心就養在勤於左右斯實虞帝明訓周王遺風朕率而行之不敢有墜伏以皇太后母臨萬嗣子惠兆人存神保和養素全道屬韶陽改候濡露感思舊恙有加常膳頓減夙夜惶惕不知所寧今當專奉庭闈躬嘗藥餌脫冠解帶且無暇於寢興負辰臨軒安能親於聽斷起今日三日以後權不聽政故茲宣示宜體朕懷

三月

大中元年積慶皇后寢疾權不聽政敕

門下朕聞恭孝之道人倫大經省奉之儀臣節攸重況發自誠悃稽諸典謨庶協禮文式遵前憲伏以積慶殿皇太后坤元降秀皇極居尊道冠母臨訓彰壺職屬時當濡露感切於

孝思氣爽保和恙生於寒暑自春歷夏有加無瘳焦憂匪違  
旦夕增灼豈尙安於聽斷且欲專於候問恐中外具寮未諒  
余意起今月十四日以後權不聽政故茲宣示宜體朕懷四  
大  
大中二年太皇太后寢疾權不聽政敕

敕朕聞孝發乎因心服勤於遺體周典著問安之範戴經存  
就養之文垂爲格言式示達禮惟朕小子敢廢前修伏以太  
皇太后母臨六宮子育羣品清淨養性恬和保神屬時暑小  
侵違豫不順寢膳未便憂灼靡寧日欲親於藥餌情豈安於  
聽斷凡有事務且委司存恐中外具寮未悉余意起今月二  
十日以後權不聽政故茲宣示宜體朕心五  
月

咸通六年太皇太后寢疾權不聽政敕



門下朕聞孝養之道發於因心誠敬之文著在前典平居以問安自慰寢疾則省侍宜專太皇太后玉衣兆祥瑤齋啟聖母儀天下德被寰中春秋既高飲食微減朕親自迎奉移居永安期宿就平勿藥有喜而精誠未感良醫無徵情方切于焦憂政豈遑於聽斷須躬問視以冀平和恐中外具察未諒余意起今月三十日以後權不聽政故茲宣示宜體朕懷一十月

服紀

代宗行再朞服詔

三年之喪天下達禮苟或變革何以教人朕遵此憫凶攀號罔極公卿固請俾聽朝政斬焉縗絰痛貫心靈豈可更議公

除便移諒闇昨見所司儀注以今月十三日大祥十五日從吉仰憑遺旨又欲抑予竊惟哀思深謂未可其百寮以此日釋服朕將繼武丁之道成素冠之詩恭默再周不忍權奪凡厥在位宜悉哀懷

義安太后服制敕

皇帝爲義安皇太后制服重輕事權知禮部侍郎陳商等狀伏觀義安皇太后升遐皇帝三日而聽政十三日小祥二十五日大祥二十七日釋服者皇帝遵奉遺旨將欲施行臣等商量事貴得中禮從順變伏以宣懿太后常奉太皇太后之令追尊徽名附配廟室今云議禮合有等殺伏請皇帝降服朞周行以日易月之制十三日釋服其內外臣寮便以其日

除釋至於所奉陵寢制度法物事以上卽請準舊例無更降授謹具如前

公卿等議大行皇太后喪禮狀

中書門下奏今月十一日大行皇太后遺令十三日小祥二十五日大祥二十七日除服者伏見陛下以因心之孝宏博愛之仁輟視萬幾刑於四海非臣等愚淺敢窺聖德然酌於羣議恐未得申伏思殷周之禮年代古遠史傳所記簡而未詳自兩漢以降文籍大備未有兄弟相友三葉重光如聖朝之禮所以母后之制罕聞故事禮經之訓時爲大體次之順次之稱次之宜次之臣等奉太皇太后令已命宣懿太后升祔禰宮昭配之禮旣存令典尊親之義必在正名皇帝服宜

有所降期年之制羣臣隨君而服亦從降禮其山陵制度及  
禮儀法物並如太皇太后故事一無所降雖屈己申情陛下  
動循於禮法而酌宜定制羣臣難抑於義心伏希聖明必賜  
察納謹具如前

正月十五日

臣等伏以

山陵寢上

臣等伏以

臣等伏以

臣等伏以

大主晉九嶷山下陵詔

臣等伏以

夫生者天地之大德壽者修短之常數故生有七尺之形壽以百齡爲限含靈稟氣莫不同焉皆得之於自然不可以分外企也雖復迴天轉日之力盡妙窮神之智生必有終皆不能免是以禮記云君卽位而爲裨莊周云勞我以形息我以死聖人之至鑒通賢之深識著之典誥貽之話言顯說正詞曾無隱諱末代以來明辟蓋寡靡不矜黃屋之尊慮白駒之過並多拘忌希慕遐齡謂雲車易乘曦輪可駐軌同趨異其弊甚矣有隋之季海內橫流豺狼肆暴吞食黔首邑里凋殘鞠爲丕墟朕投袂發憤情深拯溺扶翼義師以濟塗炭賴蒼昊降鑿股肱宣力提劍指揮天下大定氛祲清殄區宇平一反澆弊於瀛樸致王道於中和此朕之宿志於斯已畢猶恐

身後之日子子孫孫尙習流俗猶循常禮加四重之襯伐百  
祀之木勞擾百姓崇厚墳陵今預爲此制務從儉約於九嶷  
之山足容一棺而已積以歲月漸以備之木馬塗車土桴葦  
籥事合古典不爲世用又佐命功臣義深舟楫或定謀帷幄  
或身摧行陣同濟艱危克成鴻業追念在昔何日忘之使逝  
者無知咸歸冥寂若靈魂有識還如疇曩居止相望不亦善  
乎朕是以使將相陪陵又給以東園祕器篤全終之義恩意  
深厚古人之志豈異我哉自今以後功臣密戚及德業尤著  
如有薨亡宜賜塋地一所加以祕器使窀穸以時喪事無闕  
所司依此營備稱朕意焉

貞觀十  
年二月

充奉

厚奉建陵詔

人子之道存乎色養穹蒼不待創痛誠深朕觸目哀荒攀號無計終天永訣先遠有期欲報之心不勝罔極務崇兆宅庶竭哀懷應緣山陵監護鹵簿等事宜令有司備其厚禮不得節減盡庫藏之所有成遷厝之大儀公卿百寮宜悉朕意

大行太后山陵修奉事敕

蓋聞天地之德常存煦育之仁皇天大孝克念迷遵之義朕纂承丕順每務躬行而釁禍縣延再罹災疢大行太后慈顏永遠仙馭莫追遺旨丁寧俾親庶政祇奉號咽不知所措緬懷風樹之感俯追龜筮之期以復土方興役車未已慮失農桑之候或貽凍餒之憂惻然憫傷思獲均濟緣上陵所要車

牛夫役等除官中自有外並須和雇仍先折本戶夏稅錢訖  
度支以不折估匹段充填如本戶所折稅錢已盡卽所司給  
付無令損折仍委山陵使與所司切加句當不得輒令侵欺

元和十一年三月

扈從靈駕

太祖允百官表不親至山陵詔

朕永懷罔極實願匍匐園陵今臣等旣以宗社事重固相敦  
迫敬依所請倍增號絕

隨靈駕赴陵所詔

伏以山陵卜兆追躡罔極日月遄流先遠將至且如追慕之  
痛感在因心終天之喪思道達禮來月十一日靈駕發引朕



侍從親赴陵所宜令有司隨事供擬

親至華陵詔

朕祇荷丕圖仰惟先訓方追號弓之痛俯臨同軌之期將展孝思宜親營護皇太后義深鳴鳳情極攀龍亦欲專奉靈輿躬及園陵寢廟以盡哀摧之道用終哀敬之儀其大行皇帝發引日朕當從皇太后親至陵所宜令中書門下準此指揮

天祐二年三月

答百僚不赴華陵詔

朕以痛深創鉅園陵有期冀當復土之辰以慰終天之報而公卿大臣敷陳典故援引古今以爲一日萬幾不可斯須而曠既執禮而愈切難順情而有違深抑荼蓼之哀懷俯徇股

肱之讜議爰因晨省以啟慈顏倍極哀摧勉從來請

天祐二年正月

唐大詔令集卷第七十六

第六時命集卷第十六

一、

二、

三、

四、

五、

六、

七、

八、

九、

十、

唐大詔令集卷第七十七

宋 宋敏求編

典禮

陵寢下

優勞

高祖山陵畢賜元從功臣及營奉百姓恩澤詔

崇陵優勞德音

豐陵優勞德音

莊憲皇太后山陵優勞德音

景陵優勞德音

光陵優勞德音

莊陵優勞德音

孝明太皇太后山陵優勞德音

供薦

停諸陵供奉鷹狗詔

九月一日薦衣陵寢詔

親謁

親謁陵曲赦醴泉縣德音

停親謁乾陵赦  
謁五陵赦

優勞

高祖山陵畢賜元從功臣及營奉百姓恩澤詔

高祖太武皇帝天縱神武膺籙受圖可久之德格乎區宇敦

睦九族協和萬邦賢能必進德化潛洽革前王之弊興三代之風地平天成邇安遠肅至德被於四海休烈光於千載巍巍蕩蕩無德而稱焉朕嗣膺寶祚夙夜兢惕思述先志被之率土其內外姻戚平生故舊太原從官人等及歷試之所文武僚佐爰洎典吏往雖每降國恩恐未周悉或才能不伸階品屈滯或家道貧匱子孫沈淪須有矜量咸欲得所先朝優勞庶政惟以恤民爲本諸州都督刺史政績可稱者具名奏聞其諸州百姓奉營山陵宜量有蠲免可令有司詳爲條例聞奏並務從優厚稱朕意焉

貞觀元年十一月

### 崇陵優勞德音

朕以寡昧嗣膺大業永惟列祖之德肅奉山園之重夕惕若

厲懼有缺遺賴一二元臣公卿庶士協乃心力克申典禮今  
九虞既畢永慕惟深爰奉酬勞之義差其異數之命山陵使  
杜祐若子若孫與一人五品正員官禮儀使杜黃裳特加一  
階與一子六品官副使李鄴按行山陵地副使李扞賜一級  
各與一子官鹵簿使鄭雲達與一子出身儀仗使昇梓宮官  
各賜爵一階諸色職掌優賜有差三原高陵高陽縣人夫寒  
凍近道鄰村坊市屋宇什物田苗被毀損并近陵百姓偏有  
使役委京兆府勘覆聞奏挽郎挽士量加優恤旬內百姓奉  
山陵秋冬滯雨供應疲弊所配折納和糴並停

永貞元年十一月

豐陵優勞德音

朕聞王者大孝本於無違故由於禮則不替慎於終則歸厚

國有大事付余沖人永言營奉哀惶靡措雖仰遵先哲已從  
儉於因山而俯徇度荒實載勤於復土況七月之會萬方必  
臻有供億之繁有車騎之雜賴上天垂祐庶務肅成文物盡  
哀敬之容道路無風雨之氣粵自遷坐至於返虞人之協從  
禮無違者此皆一二輔弼洎左右之臣至於庶寮罔不盡力  
朕所嘉歎不忘於懷宜酬厥庸以序功次其山陵使宜與一  
子七品正員官山陵禮儀使及陵所攝太尉行事官與一子  
八品正員官山陵副使兵部侍郎判度支李選禮部侍郎崔  
頌按行山陵地使並賜一級挽郎代哭諸司職掌工巧雜役  
人夫車牛並詢其勞績各以等級賜官及出身賜勳爵進階

減勞選各有差

元和元年



莊憲皇太后山陵優勞德音

孝本因心自天子而下達禮當從祔由聖人而設範朕以寡  
祐夙罹憫凶追攀弓劍閉喬山而未幾永慕禕翟合源陵於  
此時昊天罔極追感無已俾竭誠敬用申哀懷而近臣大僚  
庶尹羣吏靡不夙夜展其勤勞備物之容旣陳嚴奉之敬斯  
在始終罔替差次宜勞式舉彝章俾新渥澤山陵所攝太尉  
行事官與一子七品正員官山陵禮儀使與一子八品正員  
官山陵副使賜爵一級其下優賜各有差園林所在供役爲  
勞憫茲充奉之勤宜頒施舍之令其富平縣今年夏稅除折  
諸色價及已徵納青苗錢除捐外並宜放免

元和十一年九月

敕朕聞孝莫大於慎終仁莫先於卹下慎終勿使之有悔卹  
下固可使忘勞自寢陵戒期郊甸充奉屬春耕肇起宿麥繼  
登百役所集羣司所備上懼一物之遺缺旣懷罔極之誠下  
念兆人之疲瘵又思不擾之德方將號從靈駕親至山園情  
爲事奪竟不獲遂賴一二元輔洎內外庶官嚴敬協心克修  
典禮永言嘉歎感咽增懷義有必酬式舉勞以申命惠無不  
浹仍蠲賦以加恩山陵使兼陵所攝太尉行事宜與一子六  
品正員官山陵禮儀使與一子八品正員官山陵副使柳公  
綽接行山陵副使李翱並賜爵一級各與一子出身橋道置  
頓使賜爵一級仍與一子官內山陵使賜絹一百匹特加一  
階山陵修築使賜絹七十匹特加一階監修橋道使賜絹七

十匹內按行山陵地使賜絹五十匹內山陵副使及修築副使各加一階鹵簿儀仗並賜一級各與一子出身橋道置頓使各加兩階昇梓宮三品以上賜爵兩級四品五品賜爵一級六品以上各一階其中有合選人前資見任各減兩選神策六軍修築山陵官健各賜絹兩匹其檢校軍使及押當所由四品以上賜爵一級仍加一階五品以下各加兩階陵所造作押當使等三品四品各加兩階仍賜爵一級五品以下各加兩階其中正員六品以下合選人前資見任各減三選白身各賜勳三轉諸司諸使應緣山陵修造及專知修造作并諸色檢校執當官典白身及直司掌上巧兒工匠等五品以上各加兩階六品以下各加一階合選人前資見任各減

兩選白身各賜勳兩轉其給直和雇者不在此限吉凶儀仗  
諸色行從官等五品以下各加一階至三品五品未合敘者  
賜爵一級六品以下各加一階如其中有合選人前資見任  
各減一選諸司諸使押管當官置頓舉幕往來檢校軍將中  
使等五品以上六品以下並加兩階白身各賜勳兩轉合選  
人前資見任各減兩選太極宮宿衛官及中使大內皇城留  
守及押當官等五品以上各加兩階六品以下各加一階白  
身各賜勳兩轉撰謚冊哀冊謚議書冊文及讀謚冊哀冊書  
寶讀寶官等五品以上賜爵一級六品以下各加一階合選  
人前資見任各減一選鑄造寶冊裝冊及檢校官五品以上  
各加一階六品以下各賜勳兩轉合選人前資見任各減一

選題木主官加一階昇寶冊官五品以上各加兩階六品以下各加一階其中合選人前資見任各減一選押鹵簿儀仗挽郎等見任者各加兩階合選人前資見任各減兩選山陵禮儀橋道置頓判官五品以上各賜爵一級仍加一階六品以下各加兩階其山陵使司官與軍將加一階合選其知東渭橋官非時放選仍優與處分知道官前資見任各減三選知頓官前資見任各減兩選按行陵地儀仗鹵簿判官及諸副使判官並諸司諸使監當雜職掌官吏等五品以上各加兩階六品以下各加一階合選人前資見任各減兩選白身各賜勳兩轉其挽郎放出身後七選許集挽士代哭挽歌等各減三年勞合選者各減兩選無勞可減者各賜勳兩轉京

兆府及諸州雇斲玄宮石匠及宮寢作頭巧兒雖給庸直就  
中辛苦各賜勳一轉諸色行事官及齋郎禮生并陰陽官三  
品以上各賜爵一級四品以下各加一階合選人前資見任  
各減一選白身各減二年勞考滿人并放出身其數處職掌  
任取穩便從一項處分應緣二仗三衛彊騎及諸色人匠并  
緣山陵應役人夫車牛等各委本府長官本軍本使本司量  
事優賞諸道應副山陵參佐軍將等各加一階諸色職役官  
吏應或減還可減者宜令所司非時與處分如有諸色流外  
充者各於本色中量減二年勞無可減者選日優與處分京  
兆府今年夏青苗錢應合徵共八萬三千五百六十貫文並  
宜放免仍委令狐楚便以山陵用不盡綾絹依實支付京兆

府充代百姓納青苗錢其近迫鄉村坊市屋宇什物田苗等有被損毀并近陵百姓偏有使役理宜節級優賞並委京兆府審細勘覆聞奏應隨靈駕挽郎挽士諸色人夫等泥雨中不免損傷委京兆府審細訪姓名聞奏量加優恤其山陵禮儀鹵簿儀仗使并諸軍諸使諸司將官吏如執當務重功效尤異委本軍本司本使具名聞奏中書門下商量奏聽進止

宣示中外咸使聞知

元和十五年六月十九日

光陵優勞德音

朕孤藐罹疾茲嚴早違靡日不懷終天無逮將欲躬護園寢哀達神明而公卿及庶寮瀝懇伏奏迫以重義奪余至情是賴一二鼎臣凡百執事咸謁嚴奉各表哀敬百靈拱衛六合

會同終始四時無爽違之憾往復千里免塗潦之虞感歎盈懷是申勞典既加恩以頒錫遂流澤以蠲租山陵使禮儀使兼陵所攝太尉行事各與一子七品正員官仍特加一階山陵副使按行使並賜爵一級各與一子出身橋道置頓使賜爵一級與一子官內山陵使兼監修橋道使賜絹一百五十匹銀器二事特加一階修築使賜絹七十匹特加一階按行使賜絹五十匹特加一階修築副使賜絹三十匹加一階鹵簿使儀仗使並賜爵一級各與一子出身橋道置備副使各加兩階昇梓宮官三品五品賜爵一級六品以下各加一階神策六軍修築官健及檢校軍使陵所造作押當官吏及中使等并諸司諸使應緣山陵修道造作及專知執當工匠等



賜物加階爵減選有差吉凶儀使諸色行從官等五品以上各加一階如已至三品五品未合敘者賜爵一級六品以下各加一階撰哀冊書寶讀冊官等五品以上賜爵一級六品以下各加一階昇寶冊官及橋道置頓官儀仗鹵簿使判官等各賜階級勳改選減有差其挽郎放出身後七選許集南郊及太尉侍中告諭冊諡寶靈坐前進諡寶奏外辦奠玉幣酌獻等各賜爵兩級餘減勞考有差其數處職掌任所便從一司處分奉先縣營奉力役勞敝極深來年夏青苗錢宜令放免櫟陽美原尚陵富平來年夏青苗錢每貫放二百文不滿貫者每百放二十文仍委逢吉與府司計科便以山陵用不盡錢與填所放錢數其近道鄉村坊市屋宇什物田苗等

有被毀損并近陵百姓偏有役使理宜節級優賞並委京兆府審勘聞奏

長慶四年十月

莊陵優勞德音

禮重節終義崇敦孝克勤奉卹之志用申罔極之感斯固寅亮輔臣奔走多士效其忠力濟是儀章俾宏加勞之澤庶表必誠之報應緣莊陵營奉其山陵使與一子七品正員官仍特加一階山陵副使按行山陵地使並賜爵一級各與一子出身橋道置頓使賜爵一級仍特加一階內山陵兼監修橋道使賜絹一百五十匹銀器二事特加一階內按行山陵副使賜絹五十匹特加一階山陵修築副使賜三十匹加一階鹵簿儀仗使並宜賜爵一級各與一子出身橋道置頓副使

加兩階昇梓宮官三品以上賜爵二級四品賜一級陵所造  
押當官及中使等三品四品各加兩階吉凶儀仗諸色行從  
官等各加一階太極宮宿衛官及中使大內皇城留守并押  
當官等五品以上各加一階撰哀冊謚議謚冊官各賜爵一  
級書冊及讀哀冊書寶讀寶官等五品以上賜爵一級六品  
以下各加一階鑄造寶冊裝寶冊及檢校官五品以上各賜  
勳兩轉中書門下儀制官題主官昇寶冊官五品以上各加  
二階六品以下各加一階山陵使禮儀使判官各特加一階  
五品以上仍賜爵一級其專知橋道官考滿日放選其知東  
渭橋官非時放選仍優與處分知道路官各減兩選知頓官  
各減三選按行山陵使儀仗鹵簿使判官并諸色諸使監當

雜職掌官吏等各加二階挽郎放出身後七選許集南郊及  
太極殿攝太尉侍中告諡冊寶及靈座前進諡寶奏外辦奠  
玉幣酌獻等官賜勳兩轉其山陵禮儀鹵簿儀仗等使并諸  
使諸司軍將官吏如執當務重功效尤異制敕中不該者委  
本軍本使本司具名聞奏中書門下奏聽進止其三原縣百  
姓今年秋青苗錢並放免其高陵縣量放一半

太和元年八月

孝明太皇太后山陵優勞德音

門下園陵之重典禮是崇故憲章旣盡於舊儀嚴奉式遵於  
古訓載深追感用惕哀懷公卿大臣洎百執事竭忠體國宣  
力協心誠敬有加恭恪無懈永告勤瘁宜洽優恩山陵使所  
攝太尉行事官與一子九品正員官山陵禮儀使與一子出

身內山陵副使昨者責辦事重與一子出身山陵使加一階  
仍賜物四十匹副使二十匹判官十匹山陵監修橋道使賜  
物四十匹判官各十匹內山陵副使加一階仍賜物四十匹  
判官各十匹山陵置頓橋道使與一子出身副使加兩階判  
官巡官巡檢專知官各加兩階合選人前資見任各減兩選  
鹵簿使賜爵一級儀仗使加一級陵所造作押當官及中使  
等三品以上賜爵一級四品以下各加一階其中正員六品  
以下合選人前資現任各減兩選白身各賜勳兩轉諸司諸  
使應緣山陵修造及專知造作諸色檢校執事當官白身及  
直司掌上巧兒工匠等五品以上加一階六品以下各賜勳  
兩轉合選人前資見任各減一選白身各賜勳一轉其給直

和雇者不在此限吉凶儀仗諸色行從官等五品以上各加一階如已至三品未合敘者賜勳兩轉四品以下各加一階諸司諸使押當官置頓營幕來往檢校軍將中使等五品以上六品以下並各加兩階白身各賜勳一轉合選人前資見任各減一選兩儀衛官及中使大內皇城留守并押當官等五品以上六品以下各加一階白身賜勳兩轉撰謚冊哀冊謚議書冊及讀謚冊書寶讀寶官等三品以上賜爵一級四品以下各加一階鑄造冊寶裝寶及檢校官五品以上各加一階六品以下各賜勳兩轉合選人前資見任各減一選題神主官加一階昇寶冊官及舉寶官五品以上各加一階六品以下各賜勳兩轉其中合選人前資見任各減一選押鹵

簿儀仗挽郎各加一階合選人前資見任各減一選山陵禮儀置頓使判官各加兩階合選人前資見任各減兩選儀仗鹵簿使判官及諸副使判官并諸使諸司監官雜職掌官吏等各加一階白身各賜勳兩轉挽郎放出身後七選許集挽士挽歌等各減一年勞合選人前資見任各減一選無勞可減者各賜勳兩轉諸色行事官及齋郎禮生并陰陽生三品以上各賜爵一級四品以下各加一階合選人前資見任各減一選白身各減二年勞考滿人放出身其數處職任取穩便從一頭處分應緣儀仗三衛彊騎及諸色夫匠代選并緣山陵應役人夫車牛等各委本府長官本軍大使本司量事優賞太常禮直官及中書門下儀制官主務皆重事無遺缺

特加一階如先已加階者委中書優與進擬諸道應奉使赴  
山陵幕府軍將等各加一階諸色職掌官吏中應合減選人  
如無選可減者令所司非時與處分如有諸司流外充者各  
與本色中量減一年勞無可減者優與處分充奉寢陵勞役  
實繁新澤所沾異渥斯及其奉先縣宜放今年夏稅青苗錢  
如已有諸色折納者卽放於秋稅斛斗據數矜免布告中外  
稱朕意焉

咸通七年  
六月八日

供薦

停諸陵供奉鷹狗詔

園陵之地衣冠所遊凡厥有司罔不祇事禮存則先型是訓  
禮失則後代何觀欽若永圖敢忘舊典頃者別致鷹狗供奉



山陵至於料度極多費損況昔誠禽荒既非尋常所用遠惟龍馭每以仁愛爲心彼耕象與耘烏且增哀慕豈飛蒼而走黃更備畋獵有乖儀式無益崇嚴載懷虧紊良深悚惕諸陵所有供奉鷹狗等並宜卽停

開元二年四月

### 九月一日薦衣陵寢制

禮祀者所以展誠敬之心薦新者所以申霜露之思是知先王制禮蓋緣情而感時朕纘承丕業肅恭祀事至於諸節當修薦享自流火屆期商風改律戴深追遠感物增懷且詩著授衣令存休澣在於臣子猶及恩私豈可園陵未標典式自今以後每至九月一日薦衣於陵寢貽範千載庶展孝思且仲夏端午事無實據傳之淺俗遂乃移風況乎以孝道人因

親設教感澣衣於漢紀成獻服於禮文宣示庶寮令知朕意  
天寶二年八月

親謁

親謁陵曲赦醴泉縣德音

朕躬膺大寶嗣隆景業虔奉成則光闡洪休昧旦兢懷宵分  
動慮蒼旻垂祐宗社降靈順黎元之心藉忠賢之力俗登仁  
壽道暨昇平遠肅邇安時康俗阜履端授節陽和肇氣親率  
庶僚奉謁陵寢遺弓茹慕切終身之憂撫鏡纏悲興寒泉之  
思敬深如在哀隆罔極薦享旣畢情理獲申式表因心宜宏  
愷澤可曲赦醴泉縣並行從人大辟罪以下皆赦除之百姓  
免今年租調左監門員外將軍常基在此宿衛進爵一等陵

令陵丞各加一階並節級賜物

永徽六年正月

停親謁乾陵敕

敕昔有獻高寢禮遵於仲月將上原陵昏達於中夜所以銜  
悲罔極申敬如在鑒於前史抑有舊章朕以寡昧興罹酷罰  
屬遠安邇肅慶承於七廟霜來露往感積於四時頃迴旆洛  
師停輿京邑蓋非省風俗希先王後后之言伏以瞻山園奉  
聖人因親之教有司已具成命必行渭北衣冠預嚴於法駕  
陵東松柏傍蔭於清道先陳翼翼之詩後展蒸蒸之慕孟冬  
屆序計日數程義在因心不忘寢寐但以近郊井隧逢時水  
旱賦於納秸未瞻規田取彼盈箱曾徵高廩而公卿常自獻  
書立議咸以爲明察敬事撫臨愛育若萬乘不備其禮固非

敬也百姓不勝其勞故非愛也況駿奔執豆夙事於象居攀  
戀遺弓載勤於奉邑以眇身之兼願殊先志之恤隱是則乖  
於濟物咎必在予所不忍言諒非獲已俯順羣情逾增遠思  
前以今年十一月二十日親謁乾陵者且停

景龍三年  
十月十日

### 謁五陵赦

祀之大者莫尊於嚴享德之至者莫加於孝敬故周廟頌思  
文之章漢陵躬展事之禮因心斯在敢不肅祇我國家應天  
受期駿惠丕命繼武宗文之德重熙累洽之盛故以道高系  
表首冠帝先朕以眇身獲保鴻業往屬多難時逢國屯推戴  
神示纂復興運允迪前烈載康兆人此蓋仗卿士之謀協人  
祇之贊豈伊薄德敢承天休露往霜來久積園陵之想秋嘗

夏禘聿思孝享之誠乃夏朔祥辰靈芝產於太室及秋吉日  
珍木瑞於神宮對越上靈拜茲嘉貺頃秋稼未實民力尙勞  
每事害農豈惟在余有咎之責因親設教恐違先旨隱恤之  
方今三時已和百禮斯洽崇牙宿設萬舞在庭敬爾神工駿  
奔執豆蠲潔爲精明德惟馨有來雍雍載懷怵惕之思至止  
肅肅如聞歎息之聲降格有終纏感罔極瞻弓劍而莫及捧  
鏡斂而哽咽始自橋岳終奉梁山紫氣昇於壽宮甘露徧於  
陵樹白兔馴擾瑞草呈祥恭惟昭陵載感王業肆台小子夙  
奉睿圖及齋戒虔誠祇率祀典聖容昭見靈迹尤彰每四方  
多虞中國有事雖升龍已遠而躍馬如神及配奠壽宮親聞  
并躍幽明合慶今古未聞蓋皇天眷於我唐神心昌於後嗣

延祚之祉豈獨在予一人錫類之恩宜廣覃於四海可大赦天下自開元十七年十一月二十二日昧爽以前大辟罪以下罪無輕重已發覺未發覺已結正未結正繫囚見徒常赦所不免者咸赦除之自天寶以來有雜犯經移近處流人并配隸磧西瓜州者朕捨其舊惡咸與維新並宜放還其反逆緣坐長流及戍奴量移近處編附爲百姓左降官量移近處官人有亡官失爵齒力未衰者量加收錄百姓無出今年地稅之半如已徵納聽折來年逋租懸調在百姓腹內者一切放免孝子順孫義夫節婦旌表門閭終身勿事諸州侍老百歲以上賜帛十段九十以上賜五段八十以上賜三段獻陵定陵官吏并管陵縣官各別加一階陵戶並放從良終身灑

埽陵寢仍每陵側近取百姓六鄉以供陵寢永勿徭役自古帝王賢臣將相陵墓宜令所在州縣致祭内外文武官三品以上加爵一級四品以下各賜一階寧王憲辭王業各賜物八百匹忠王浚棣王洽鄂王滉光王滉等各賜物七百匹中書門下賜五百匹開封王毛仲賜物三百匹皇親五等以上諸親三等以上及文武百寮各賜有差自古明王因心以待人由己以施物故休戚共而憂樂同也中書門下丞相尙書開封府三司大將軍父贈三品官九卿三監十二衛監軍羽林軍五省官三府尹大都督府長史父各贈四品官五品以上清官父各贈五品官凡所贈官宜兼贈母邑號俾夫羣臣受榮上延父母先帝遺澤下及幽明興言及此良多感歎羣

臣一體榮辱是同龍蛇之歌古今作誠其唐隆元年兩營立  
功官三品以上與一子官其四品以下選日優與進改京兆  
府供頓免今年地稅諸道戰亡人家仰州縣存恤不支濟者  
量事賑給諸軍健兒別敕行人各賜勳兩轉

唐大詔令集卷七十七



臣伏願帝聖德

臣伏願帝聖德

臣伏願帝聖德

臣伏願帝聖德

臣伏願帝聖德

臣伏願帝聖德

臣伏願帝聖德

臣伏願帝聖德

臣伏願帝聖德

臣伏願帝聖德

臣伏願帝聖德

唐大詔令集卷第七十八

宋 宋敏求編

典禮

追尊祖先

上聖祖大道玄元皇帝號并五聖加諡制

追尊玄元皇帝制

追尊先天太皇德明興聖皇帝等制

加諡祖宗

諡議

順宗加諡至德宏道大聖大安孝皇帝議

憲宗加諡昭文章武大聖至神孝皇帝議

冊文

聖祖大道玄元皇帝加號冊

高祖神堯大聖皇帝加諡冊

太宗文武大聖皇帝加諡冊

高宗天皇大聖皇帝加諡冊

中宗孝和大聖皇帝加諡冊

睿宗玄真大聖皇帝加諡冊

赦

加祖宗諡號赦

國忌

國忌在近進蔬菜詔

增忌辰設齋人數敕

廢國忌日行香敕

追尊祖先

上聖祖大道玄元皇帝號并五聖加諡制曰

握乾圖者必稟於元命宗道本者允屬於強名是知報功通  
昭感之德尊祖貴協崇之義朕祇荷丕業恭臨大寶何嘗不  
宵衣滌慮菲食齋心奉玄聖之垂範爲蒼生以祈福自頃昊  
穹眷命至道降休玉芝再產眞容累見嘉應荐來罔知攸答  
豈謂玄記陰騭祕牒混成懸徵造化之源密紀仙靈之度慶  
崇眞錄昭錫朕躬初驗神傳竟彰天授幽深累跡殊異於人  
代朴畧奇象固絕於名言緬覲皇圖欽奉道寶微旨有屬寅

畏增深思申嚴敬之誠以崇廣大之業謹上玄元皇帝仍以  
來月五日朕親奉冊禮國家文祖神宗重熙累洽無爲之訓  
垂祐清靜之德在人慎寧後昆累承大業是用欽玄符之景  
命歸清廟之延祥稟慶真源光昭聖烈謹上高祖神堯皇帝  
尊諡曰高祖神堯大聖皇帝太穆皇后竇氏尊諡曰太穆順  
聖皇后太宗文武聖皇帝尊諡曰太宗文武大聖皇帝文德  
聖皇后長孫氏尊諡曰文德順聖皇后高宗天皇大帝尊諡  
曰高宗天皇大聖皇帝大聖則天皇后武氏尊諡曰則天順  
聖皇后中宗孝和皇帝尊諡曰中宗孝和大聖皇帝和思皇  
后趙氏尊諡曰和思順聖皇后睿宗玄眞皇帝尊諡曰睿宗  
玄眞大聖皇帝昭成皇后竇氏尊諡曰昭成順聖皇后肅明

皇后劉氏尊諡曰肅明順聖皇后庶彰祈精之感降貽厥之  
元符聿修誠□□□達孝思于罔極更以來月五日於太清  
宮前恭申冊禮宜令所司卽詳定儀注聞奏

追尊玄元皇帝制

大道混成先二儀以立極至仁虛已妙萬物以爲言粵若老  
君朕之本系爰自伏羲之始洎乎姬周之末靈應無像變化  
多方遊元氣以上昇感星精而下降或從容宇宙吐納風雲  
或師友帝王丹青神化譬陰陽之不測與日月而俱懸屬交  
□在辰晦迹柱下大宏雅訓垂示將來雖心齊於太虛而理  
歸於眞宰若夫絕聖棄智安神寡欲寂寞窅冥之際希夷視  
聽之表澹爾無爲脩然自得酌之不竭用之不盈執大象而

還漳滌玄覽而遺累邈乾坤而長久跨陶鈞以亭育至矣哉  
固無得而稱也況大道所崇克昌寶祚上德所履允屬休期  
朕嗣膺靈命撫臨億兆總三光之明而夙宵寅畏居四大之  
重而寢興祇惕盡孝敬於宗祧罄懷柔於幽顯行清靜之化  
成太平之業登介丕以展采坐明庭而受記飛煙結慶重輪  
降祥鶴應九歌山呼萬歲越振古而會休徵冠帝先而爲稱  
首大禮云畢迴輿上京肅駕瀨鄉躬奠椒醕仰瑞帟而延佇  
挹神泉而永歎如在之思旣深敬始之情彌切宜昭元本之  
奧以章神聖之功可追上尊號曰太上玄元皇帝祠堂廟宇  
並令修勅廟置令丞以供薦饗仍改谷陽縣爲眞源縣宗姓  
特給復一年冀崇追遠之懷用申尊祖之義主者施行

乾封元年

二月二  
十二日

追尊先天太皇德明興聖皇帝等制

門下庇人生者必崇於大道受成命者實賴於前烈恭惟大  
聖祖玄元皇帝道光太極首出渾元宏敷妙門廣運真化雖  
乘時御氣已超昇於上清而儲祉發祥每敷祐於來裔祚我  
寶運格於皇天爰自創業迨於茲歲頻彰景貺屢覩真容使  
夫天清地寧物阜民庶六氣時若四海來王皆聖祖之感也  
至道之應也成功不宰豈假於強名降福無疆敢忘於昭報  
是用薦徽號增禮冊蠲潔以盡敬躬親以致誠亦既昭格良  
深感慶宜因展事更廣揚名夫聖人之生乃先天地應變無  
體其德猶龍雖窅冥之初不知誰之子而誕靈之後亦必有



先聖祖父母著在圖牒母益壽氏已崇徽號曰先天太后父周正御史大夫敬追尊爲先天太皇仍於譙郡置廟自餘一事以上準先天太后例昔契敷五教殷以爲祖稷播百穀周以配天況咎繇邁種黎人懷德我之本系千載彌光敬追尊爲德明皇帝涼武昭王朕十一代祖也積德右地炳靈中葉奄有萬國兆先帝功敬追尊爲興聖皇帝其陵側近仍並禁樵牧春秋二時備禮致祭且聖祖所理本在諸天將欲降靈固宜取象況爲帝號豈可名宮其玄元宮西京宮宜改爲太清宮東宮改爲太微宮天下諸郡改爲紫極宮兩京宮內道士宜先擇有道行者一十人自餘於新度人中簡擇取添滿三七人爲定額仍各賜近城莊園各一所并量賜奴婢等其道

士女道士等先令司封檢校不須更隸宗正寺所置崇元署  
宜停古人制禮祭用質明義兼取於尙幽情實緣於既沒我  
聖祖湛然常在爲道之宗旣殊有盡之期須展事生之禮自  
今以後每於聖祖宮昭告宜改用卯時以前行禮朕深惟復  
朴將致無爲常恐至理難參元風未暢不有時習焉能化成  
自今以後每至三元日宜令崇元館學士講道德南華等諸  
經羣公百辟咸就觀禮庶使軒冕之士盡宏南郭之風寰海  
之內咸爲大庭之俗其崇元學士補置猶近於經術或未精  
通又屬初崇聖號親行典冊宜宏勸獎以示恩惠至舉日試  
及佔并策各減一條二年業成照依常式其崇元館大學士  
宜賜物一百匹學士賜六十匹直學士賜四十匹宮內先配

住道士各賜二十匹仍令所司具作條件處分宣布中外令  
識朕懷主者行施

### 加諡祖宗

#### 諡議

順宗加諡至德宏道大聖大安孝皇帝議

臣融議曰王者則高明以茂育法博厚而含宏象日月以照  
臨如雨露而膏澤諡以令德昭於至公卽軒轅顓頊文王武  
王是也其有喪旌未副則宜爲增美尊名伏惟順宗至德大  
聖大安孝皇帝道合二儀明齊兩曜恩沾萬物信若四時位  
踐重光名高少海寢興有度視聽必端昔德宗駐蹕奉天禮  
行巡幸埽除凶寇實賴春闈每誓眾之初而吐言激切及撫

軍之際皆感動師人泊車馬還都歡娛宮禁朝夕視膳晨昏  
問安是居承華毓德望苑日彰孝愛三十七齡三善益表於  
元良六氣忽嬰於沈痼德宗以龍樓重嗣惟疾之憂醫藥躬  
勞至於大漸順宗昭事德宗之節也洵古無對德宗鍾念順

宗之至也前史莫倫父子之親君臣之義垂榮萬國流慶千  
年及歷數自天紹承丕構不敢牢讓方遵永圖師唐虞之德  
以覆幬天下纂禹湯之化以煦育黎元薄賦蠲逋省刑恤隱  
深仁降威沛澤旁敷減去宮人斥絕奇貢臨軒廣愛焚煇毒  
於通衢憑檻興仁放孤鷺於維繫歸功臣之甲第而中外謳  
歌黜殘酷之劇吏而遠近欣服虔恭九廟睠佑萬邦宵旰勤  
劬詎思頤衛於是託付冢嫡壯平皇猷以明繼明以聖傳聖

孝德垂名於不朽睿謨貽慶於無疆是生聖明收復河隴刷  
百載失地之恥滌八聖強鄰之羞陛下不有其功美歸祖考  
追加尊諡申重鴻名易曰天地之大德曰生聖人之大寶曰  
位經曰德者同於德道者同於道諡法曰寬裕和平曰安克  
慎所安曰孝伏惟順聖皇帝端拱造物秉運統天可謂至德  
也感神翊思光明正位可謂大聖也永圖丕構傳聖和保可  
謂大孝也臣融定加諡號謹上尊諡曰至德宏道大聖大安  
皇帝謹議

憲宗加諡昭文章武大聖至神孝皇帝議

臣融議曰皇莫尊乎義軒帝莫大於堯舜咸有上諡光昭厥  
猷先德巍巍徽美未稱則必追加大號式重鴻名伏惟憲宗

神明武孝皇帝神授英明天假文武德惟孝養仁著君臨功  
格元穹道孚皇極詞懸日月學奧乾坤揚十聖之耿光冠百  
王之丕績伏以天寶之末大歷之中郡國有倔强之臣朝廷  
行姑息之令所以李錡拒命始於宗枝劉闢稱兵起於儒吏  
伏惟憲宗皇帝上遵太宗之法次覽軒后之書親近正人委  
任輔相修明綱紀震動雷霆翦滅渠魁征討叛亂無職不舉  
無賢不詢將靖萬方用清四海號令必一視聽無私故得夏  
臺伏質於沙陲上黨受禽於城鎮西蜀獻俘而玉京正法東  
吳納寇而金陵廓開郾城纒下而申蔡削半鄆帥就誅而齊  
魯盡復皇威遠震神算無遺時也滄景屏息以朝天易定東  
身而納地海內無事天下一家萬國來賓百蠻向化方興謀

於外國深注意於河湟伏以疆土開拓而王業肇興天地合德而人心協順故得濟生靈於塗炭宏至理於馨香四海樂推百蠻稽服今陛下不有其功歸於先志揚茲上善既讓於天能光祖宗繼述前聖昨者丞相卿士請加鴻名陛下固秉謙沖再三不允今追尊祖考榮冠禹湯伏惟憲宗神聖章武孝皇帝乃聖乃神乃武乃文盛德大業經天緯地記曰武王周公其達孝矣乎詩曰文王受命有此武功臣融定加諡號謹上尊諡曰昭文章武大聖至神皇帝謹議

閏十一月十七日宰臣於延英殿面奉聖旨收伏河湟繼述先志將欲尊順宗皇帝憲宗皇帝

右兵部尚書臣融奉閏十一月二十三日敕牒差臣定諡號

者學慚淺薄文愧空虛先聖尊號謬論膺讓不敢不罄竭愚  
悃上副天心今謚號已成謹輒進順宗皇帝謚號一卷憲宗  
皇帝謚號一卷並各封進無任云云謹具如前敕旨敬依典  
禮不任摧感宜付所司

冊文

聖祖大道玄元皇帝加號冊

維天寶八載歲次己丑閏六月癸亥朔四日丙寅曾孫嗣皇  
帝臣隆基奉冊大聖高祖玄元皇帝臣聞有萬物者本乎大  
道稱謂所極乃強名焉通三才者存乎大寶敬教所底唯崇  
號焉伏惟象帝啟元猶龍表聖應代降跡立言垂範沖融之  
功覆幬於天地救濟之德亭壽於生靈垂裕邦家克保丕業



顧以眇躬纘承丕緒永惟孚祐以致太和頃者玉芝再產上  
記陰騰是用恭膺景命肅事鴻名既刻元辰薦彰嘉貺則有  
卿雲散彩瑞日重輪欽承降鑿載深兢惕謹上加尊號曰聖  
祖大道玄元皇帝伏惟昭膺盛典永貽休烈

高祖神堯大聖皇帝加謚冊

維天寶八載歲次己丑閏六月己亥朔四日丙寅孝曾孫嗣  
皇帝臣陸基敢昭告於高祖神堯皇帝伏惟乾坤合德歷數  
在躬俯順人心肇興王業濟生靈於塗炭宏至理於馨香四  
海樂推百蠻稽服故得應圖協緯開國造邦願以眇德纘承  
丕績永惟孚祐以致太和頃者玉芝再產上玄陰騰欽承景  
命肅事鴻名既刻元辰薦彰嘉應則有卿雲散彩瑞日重輪

恭惟降鑿載深兢惕謹上加尊諡曰高祖神堯大聖皇帝伏  
惟俯鑒虔誠昭升盛烈祇奉典冊伏增感慰

太宗文武大聖皇帝加諡冊

維天寶八載歲次己丑閏六月癸亥朔四日丙寅孝曾孫嗣  
皇帝臣隆基敢昭告於太宗文武大聖皇帝伏惟英喆自天  
應期撥亂翼戴元皇大拯橫流九服載安百蠻俾乂功冠開  
闢德被生靈故干戈之動協於湯武文章之盛縣於日月克  
昌大業永建皇圖顧以眇身祇膺寶命恭惟孚祐以至和平  
頃者玉芝再產上記陰騭是用欽承丕祉肅事鴻名既刻元  
辰薦彰嘉應則有慶雲散彩瑞日重輪永惟降鑿載深兢惕  
謹上加尊諡曰太宗文武大聖皇帝伏惟俯鑒虔誠昭升盛

烈祇奉典冊伏增感慰

高宗天皇大聖皇帝加諡冊

維天寶八載歲次己丑閏六月癸亥朔四日丙寅孝孫嗣皇  
帝臣隆基敢昭告於高宗天皇大帝伏維繼文纘聖嗣武居  
尊保合太和緝熙庶績萬邦作乂百度惟貞興弔伐之師展  
對崇之禮無有遠邇罔不率從仁風汪洋德澤滂沛能事超  
於邃古休聲貫於列辟顧以眇德纘承丕緒永惟敷祐以致  
太平頃者玉芝再產上記陰騰欽奉景命肅事鴻名既刻元  
辰薦彰嘉應則有慶雲散彩瑞日重輪恭惟降鑒載深兢惕  
謹上加尊諡曰高宗天皇大聖皇帝伏惟鑒陞虔誠昭升盛  
烈祇奉典冊伏增感慰

中宗孝和大聖皇帝加諡冊

維天寶八載歲次己丑閏六月癸亥朔四日丙寅孝姪嗣皇帝臣隆基敢昭告於中宗孝和皇帝伏惟睿聖日躋文思天從重昌大業光啟中興允昭嗣夏之功克荷纘堯之緒武以靖亂文以經邦流愷悌之風布寬和之政故得三靈協贊百姓與能庶績咸康彝倫有穆顧以眇德纘承丕緒永惟敷政以致太和頃者玉芝再產上記陰騭欽承景命肅事鴻名既刻元辰薦彰嘉應則有慶雲散彩瑞日重輪恭惟降鑒載深兢惕謹上加尊諡曰中宗孝和大聖皇帝伏惟俯鑒虔誠昭升盛烈祇奉典冊伏深感慰

睿宗元真大聖皇帝加諡冊

維天寶八載歲次己丑閏六月癸亥朔四日丙寅孝子嗣皇帝臣隆基敢昭告於睿宗大聖玄真皇帝伏惟明哲齊聖文思光澤炳茲龍德潛躍應期靖難安人克昌休運臻於至道惟懷永圖顧以眇身嗣膺寶命恭惟敷祐以至太和頃者玉芝再產上記陰騭是用欽承景貺肅事鴻名既刻元辰薦彰嘉應則有慶雲散彩瑞日重輪恭惟降鑿載深兢惕謹上加尊諡曰睿宗玄真大聖皇帝伏惟俯睠虔誠昭應盛烈祇奉典冊伏增感慰

赦

加祖宗諡號赦

王者之御天下也莫不懋建皇極惟懷永圖先德禮以道人

用刑政以佐理順四時而並施其化育萬物而各遂其宜然  
後闢土開邊遠柔邇悅眾享美利斯爲大寧我國家以仁義  
造有乾坤以道德撫安華夏其高祖太宗經綸之列聖繼體  
守持之重光累洽延禧景鑠及於憲考文明武英剡根莠於  
甫田振威靈於殊俗肅清澄廓庶績其凝實推中興歷十五  
載今余小子大構是承祇奉宗祧敬若天命遐慕唐堯恭讓  
之德常勵漢文菲薄之躬懷乎憂勤懼忝負荷每念河湟之  
壤陷爲戎虜之疆百有餘年一失莫復元和中將雪前憤嘗  
振睿思方除孽臣未就成業永懷遺訓明發疚心近者祖宗  
降靈中外協慶不煩攻伐不費財儲六郡連收七關盡復投  
戈解甲樹領乞降凶渠竄亡億兆鼓舞厥庸有功繼志克成

仰襲不休聊用無愧臣下欲歸虛美強我鴻名斯實先聖神  
功因願追尊加諡牢讓乃遂孝思獲申頒告寰區同茲徽慶  
且慮蒸黎之困猶疑獄犴之冤爰因獻歲之辰乃行在宥之  
典可大赦天下自大中四年正月一日昧爽以前大辟罪以  
下已發覺未發覺已結正未結正繫囚見徒罪無輕重咸赦  
除之唯犯十惡官典犯入己贓不在赦限

國忌

國忌在近進蔬菜詔

朕聞大孝塞乎天地色養著乎人倫自古迄今乃生民之本  
也朕之不幸往逢艱疚未明之間屢所哀感舉目獻歎永懷  
罔極追慕之痛鍾此蕤賓不樂之辰繼乎旬朔宜令外廚斷

牲鱗唯進蔬菜

增忌辰設齋人數敕

忌辰設齋雖出近制斟酌損益貴於得中況在不遷之宗允資異數之禮五月六日二十六日兩忌設齋人數宜各加至二十人太穆文德皇后忌日亦各加倍數其寺觀仍舊十二月八日忌辰於五所寺觀共設四千人宜令所司準式

大和九年

月四

廢國忌日行香敕

朕以郊廟之禮嚴奉祖宗備物盡誠庶幾昭格恭惟忌日之感所謂終日之憂而近代以來皈依釋老徵二教以設食會百辟以行香將以仰助聖靈而資福祐有異夫皇王之術頗



乖教義之宗時因崔蠡奏論遂遣討尋本末禮文令式曾不該明習俗因循雅當釐革京城及天下州府國忌日於寺觀設齋行香起今以後並宜停

唐大詔令集卷第七十八